



秋

笈

集附錄

一



秋 笳 集
附 錄
(一)

吳兆騫撰

秋笳集小引

弟兆宜顯令撰

蓋聞山禽鐵羽。怨四子之分飛。庭樹敷榮。歎三荆之同本。是以靡依參佐。愛比機雲。家藏賜書。學同彪固。茱萸兩地。寄摩詰之幽憂。春草一塘。勞惠連之夢寐。余兄漢槎。以惠子五車。陳王七步。琉璃雕管。題成芍藥之工。翡翠筆牀。篇擅芙蓉之譽。何來謠詠。遽悼漂離。馬伏波之薏苡。溪水墮鳶。楊中監之氍毹。塞天留雪。迢遙紫土。水咽松花。灑逆黃雲。關寒榆葉。托嘶馬以長征。望孤鴻而永憫。穹廬靜夜。遙聽邊笳。刁斗凌風。時聞塢笛。蒲萄藏貴相之谷。豈易消憂。琵琶調馬上之絃。徒然增戚。此執珪所以越吟。而軍府爲之南操者也。况夫鶴鄺萬里。萱背無依。雞塞頻年。棣華空茂。帛書雁足。向南望而程遙。尺素魚鱗。思北馳而路渺。夏連積雪之嶺。疇念衣單。秋轉飛蓬之根。獨憐衰草。遂使垂虹烟柳。限若羊腸。笠澤鶯花。杳如馬角。鐵衣遠戍。蕭條銀磧之聲。牙帳從軍。憔悴金微之客。嗟乎。生存華屋。子建以之哀吟。貧賤親離。顏遠因而悲咽。陶彭澤有停雲之作。孫子荆有零雨之篇。緬彼安居。尙多感慨。矧伊遠謫。能不凄其。由是搆茲危苦。扞後勞歌。命曰秋笳。彙成一集。陳子公之蘭河城邑。並入縹囊。郭景純之山海圖經。咸盈赤軸。聊述窮鳥之賦。用當塞客之吟。健菴先生。標俊及之鴻名。推藝林之淵府。三虎聯鑣。登鼉頭而縹緲。九飛齊奮。搏鸞翼以逍遙。身既托于重霄。情彌深于舊雨。慷慨縹袍之戀。清俸時捐。徘徊歧路之隅。芳訊屢及。讀定遠玉關

之札。側望沾襟。接都尉塞外之詩。悲涼貫涕。迺謀劄。以壽棗梨。將令開府思鄉。人頌江南之賦。若使孝
儀歸國。家貽使北之書。余慙居第五之名。兼切在三之義。春風秋月。湖景淑而羣離。暑雨祁寒。驚節序而
滋威。時披華製。以代萱蘇。敢藉短翰。而仰斧藻。自此蔡女清笳之拍。樂府俱傳。晏子脫驂之恩。故人共感
云爾。

秋笳前集卷五序

練水盟弟侯元泓研德撰

漢槎吳季子。今之賈生終童也。出其餘技爲歌詩。才名籍甚吳楚間。與予遇於虎阜。抵掌莫逆。遂出詩編。屬余弁語。予結髮誦詩。自成童時。常與兄弟朋好。跌宕江湖。有唱有答。然終不能名一家。十餘年間。泆被傾覆。羣從凋喪。嚮者雕蟲末技。兵燹散亡。而予益頽然廢放。漸改聲華。如溝斷散樛。以不才求全矣。雖然。風雅之原。聲情之本。酒酣狂來。尙能爲季子言之。夫詩之爲用者。聲也。聲之所以用者。情也。豳風二南。二雅三頌。或出於婦人小夫。衝口率志之作。或出於元臣碩老。諷諭賦述之言。泳洙休明。抒寫道德。情盛而聲自叶焉。遂登樂章。歌薦朝廟。此天下之真聲也。若夫情曼者其聲暉。情伉者其聲厲。情危者其聲烈。情豫者其聲揚。是數者雖詭於和。而情之所激。皆足以鏗鏘律呂。感動鬼神。相鼠之詩。其聲率。山樞之詩。其聲迫。迫且率。而仲尼不刪者。爲其情真也。真故不諱其激。有激極而和之勢焉。此亦聲亞也。六季三唐。刻鏤組繪。南北二宋。披猖率埜。聲情交叶。什無二三。何大復常謂唐初四子。音節可譎。子美調失流轉。予初聽之。然究其所撰明月篇。聲浮於情。學者從是矯宋元之過。相與規步音響。趨摹格調。而天下之情隱者。亦大復爲之戎首也。數十年以來。聲盛者情僞。情真者聲俗。兩家之說。戛然不入。而其不諧真樂則同。終亦成其兩僞而已矣。予雖稍有窺見。自愧能知而不作。悠悠塵渣。莫可爲盡也。竊願焉。季子以其髫鬣之

歲。嶇江楚。弔沅湘。指衡霍。劍槩相摩。龍虎爭搏。華年盛氣。掉臂出沒。乎其閒。故其爲人。英朗雋健。忠孝激發。凡感時恨別。弔古懷賢。流連物色之製。莫不寄趣哀涼。遺音婉麗。情盛而聲叶。非季子其孰能及之。而予回首昔時。與兄弟上潯陽。經廬嶽。分曹課句。睥睨爭雄。銜杯一笑。江波振起。今日獨與季子談河山之變遷。數風雲之滅沒。燈炮酒闌。騷屑偃蹇。其能無樂極而哀來。婆娑而弔影乎。雖然。季子伯兄宏人。以其文章器識。領袖羣彥。仲子聞夏。撰述英多。一時屈讎。與予兄弟交十餘年。猶兄弟也。季子出而玉振之。予不孤矣。遂書之。爲其詩序。

雜體詩卷六序一

吳門同學盟弟宋實穎既庭拜題

雜體詩之擬。始于謝康樂。盛于江文通。其言謂楚騷漢風。既非一骨。魏製晉造。固亦二體。然蛾眉不同美。而俱動于魄。芳草不同馨。而悉悅于魂。非性情使然歟。予友吳子漢槎。衛子冰清。謝家玉潤。翩翩雋逸。望者疑神仙中人。及讀其詩。則又氣體高妙。波瀾獨老。盧駱王楊之藻采。李杜高岑之風則。無不兼備。蓋擬議之迹化。天然之致勝也。使與北地信陽。並驅中原。尙當退避三舍。矧歷下長興諸公哉。今秋予過松陵。漢槎出擬雜體詩示予。聲情慷慨。格調悲涼。大有山河離別。風月關人之感焉。仲宣流連于漢南。子山羈旅于江北。帶甲滿天。笳歌動地。文人遶會其時。性情實有相符者。胡霜金柝之章。蕙草闌干之句。信可以鑠謝凌江矣。豈云團扇秋風。芙蓉綠竹。取古人之眉黛。代一己之萱蘇已也。酒酣耳熱。涼星三五。戲語漢槎。歲月不居。風流易散。後有作者。于宏人。研德。甫草。茗文。俊三。武功。諸子。未知當作何擬。漢槎其操不律。以豁我愁乎。

秋笳集目錄

吳江吳兆騫漢槎氏著

卷一

賦

春賦

秋雪賦

羈鶴賦

蘭賦

萍賦

長白山賦

竹賦

陶彭澤無絃琴賦

卷二

詩一

秋笳集 目錄

曉發撫寧題逆旅壁

山海關

關上留別潘守戎

出關

榆關老翁行

次前衛

同諸公登中後所戍樓

錦州道中登海邊舊保障臺上有傳烽桔槔

塔山道中望海二十韻

廣寧道中作

登廣寧城望城外佛舍因同諸公却過

沙河道中

次沙河砦

瀋陽旅舍賦示陳子長

贈赤公

同陳子長坐氈帳中話吳門舊遊愴然作歌

同陳子長夜飲卽席作歌

將發瀋陽過子長飲愴然有作

撫順別孫赤匡劉逸民

發年馬留別瀋陽諸子

贈海南曾生

曉起

城樓曉望

過朝雞屯

夜宿陰溝關有懷子長

陰溝關

高麗營

五日阻水年馬河

贈陳心簡

四道嶺

黑兒遼河眺望

早發尼失哈

次了深河水漲不得渡賦呈方岡樓

七夕次喇伐朵洪

喇伐道中

小烏稽

大烏稽

交河山中夜行

過烏孫法噴

北風

雨雪

遼瀕眺望

海邊獨眺

贈吳稗恭散騎

徑僻

曉雁

趙宮舊姬

沙林道夜行聞鶴

對月

北渚望月

空城中見棲鳥感而成咏

寄懷陳子長

寒食大雪

可汗河曉望

曉坐

同德惟及門人陳昭令遊北山

卞生過飲

夜行

沙嶺晚歸

過灰扒廢城

庚子至日書懷三十韻

賦得春風和方邵村作

送人之渾蠢

校獵卽事

憶舊書情寄陳子長一百韻

見離燕

書壁

辛丑七夕

過恭順侯吳公寓齋奉贈

贈故太常樂工申叟

人日過錢子

送巴參領

曷木逆還曉發

送阿佐領奉使黑斤

許康侯總戎招飲城東江上

阿波道中同姚琢之馬上作

曉自沙嶺至馬耳河

七夕陪諸將飲

贈舊參領穆君

送人西行

沙嶺作

同諸公飲城東水次分韻得春字

海郎山靈湫神女歌

帳中夜坐

訓子長見懷之作二首

贈人

送人從軍

上巳同錢德維姚琢之飲江上

席上賦得吳郡

宮怨

七夕

過琢之齋

九月八日作

九月自木丹山歸過淨公蘭若

九月十六夜之密將訪馮侍御炳文

春草園林圖歌贈友

先旦

贈色君

郝奕喜初至留飲

木參領還自西域賦贈

三山道士工馬便射賦此贈之

送薩參領

贈張侍郎坦公次姚琢之韻

東錢子方叔

贈少年

贈吳興錢虞仲

早秋陪諸公遊密將山

送人

寄懷陳子長

寄懷孫赤崖

送人之梭龍

春夜歸自西郊不寐閱顧華峯舊所寄札

詠張侍郎齋前小松

送薩參領入都

贈人

瓜兒屯值雨晚過村叟家宿卽事書寄孫赤崖陳子長五十韻

宿混同江明日立秋

秋山觀姬人採花

送友人

重陽夜送人西行

九月十日雨雪達暮寄琢之

卷三

詩二

冰井曲

讀張司空所撰岱史奉贈

送哈佐領之朝鮮

曉登東嶺寄楊友聲次琢之韻

早春集錢虞仲齋

馬耳山中同姚琢之作

聽高小乾話秦淮舊事作

代姬人寄贈錢茂才方叔

送巴公子之京

送錢丹季之松花兀喇

少年行

山中晚行至阿波屯宿

張坦公侍郎齋中觀白蓮歌

早秋同錢子

秋夕同諸君飲張司空凭嵐閣

寄王總戎

送人至羌突里街

送友人還兀喇

阿波山中訪張子

自密將夜歸登舊寧古臺

黑林

郊行贈雁羣

夜飲色侍中宅卽事成詠

奉送大將軍按部海東

寄錢子方叔

張侍郎齋觀山水畫卷歌

卽事

上巳許康侯招同諸君禊飲江上卽席分韻得年字

阿波山中呈安都統

渡混同江

送人之粵東

咏隣姬

曉行

與桐柏山人

奉送巴大將軍東征邏察

秋夜師次松花江大將軍以牙兵先濟竊於道旁寓目卽成口號示同觀諸子

城東書感

曉望

送人歸遼東

寄友人

九月八日病起有懷宋旣庭計甫草因憶亡友侯研德宋疇三丁繡夫

九日

奉寄陳相國素庵先生

送使者之蒙古

與劉子良閱廣輿記因爲予話隴外地形賦此

奉送安都統安集海東諸部因便道閱松花江水軍

陪張侍郎坦公遊西嶺

贈孔叟

遊西山蘭若二十韻

送米參領

寺樓曉望有懷

聞溪聲有感

送姚琢之赴兀喇

同友人夜飲卽席作歌贈之

八月十五夜望月作

登樓

九日登東山憶甲辰此日同馮炳文侍御遊睡河上錢虞仲茂才以五言長律相贈今馮錢皆

逝溯懷疇昔情見乎辭

野宿

寺樓雨望懷楊友聲

贈高生

山行有懷舊遊諸子

晚自雞嶺崖至天龍屯

寒食日作

芳樹

巫山高

銅雀伎

山中孺子妾

結客少年場

湘妃怨

長門怨

妾薄命

將進酒

採蓮曲

春曲

閨怨

與定之飲

早秋姬人有悲落桐者感而賦此

贈張繡虎

同陳昭令遊西山道院

寄琢之

山夜觀打魚

奉送副都統安公之烏龍江

與張繡虎飲

王定之過

置酒歌

登西閣

送友人

九日同德維雁羣兩同年西山登高

九月十二晚望回獵賦贈薩君

寄琢之友聲

一盞岡夜行

秋日雜述五首

贈友

贈唐副帥

題淨公房

送人之榆關

獨行城東循山至白崖

秋夜送卞書記赴軍幕

同雁羣城南泛舟至白崖口

密將山晚歸東陳衛玉馮玉文

晚步原上

晚登天羅嶺東陳雁羣

西山閣晚眺

夜同諸君飲江亭

木丹山曉行

自木丹還城作

蒙古屯同雁羣晚眺

帳中示雁羣

冬至懷繡虎却寄

除夕

雞嶺崖與王定之別

觀姬人入道歌

山中

帳夜

寄贈姜京兆定庵二十韻

封祀長白山二十韻

西曹雜詩

卷四

詩三

戊戌三月九日自禮部被逮赴刑部口占二律

四月四日就訊刑部江南司命題限韻立成

感懷詩八首呈家大人

聞有家信遂成

寄內二律

偶成二律

秋夜寄計甫草

答贈丁繡夫二首

寄懷袁文生黃平子二子

有感三律次陳子長韻

送人還江南

送姚子上還荊州

九日同陳子長飲分得十五刪

卽席再用前韻答贈子長

再和子長

感寄

夜坐柬子長

白頭宮女行

秋雁篇

冬日同子長賦限韻立成

冬夜同諸子飲方坦庵先生齋卽席賦呈

夜同子長過方婁岡學士賦贈

送張繡虎南行和陳相國

戊戌除夕偕諸子集陳素庵先生齋卽席同直方子長賦

己亥正月朔夜同子長小飲口占

人日同子長賦

答贈陳子長

正月九日望月同子長

元夕同直方子長賦

春雪篇

感示子長

閏二月朔日將赴遼左留別吳中諸故人

秋笏前集

卷五

詩四

春日篇

金陵篇

長安道

洛陽道

塞上曲

塞下曲

紫駟馬

劉生

關山月

雨雪曲

班婕妤

銅雀伎

晚眺寄計甫草

寄楚黃王涓來

送人之越東卽席分得蕭字

雜詩同楊俊三作

自紵辭和宏人大兄

長安有狹邪行

漢武宮詞

開元宮詞

行路難和吳海序計甫草

子夜歌和顧茂倫

五日觀競渡因憶楚荆一百韻

美人篇和聞夏二兄

金陵

夜次京口

揚州

登漢陽晴川樓時逆獻已陷斬黃

岳州

湘陰

君馬黃贈張九臨

東飛伯勞歌同計甫草趙山子作

秋夜同楊俊三作

冠霞閣同顧茂倫趙若千晚眺

秋感八首甲申九月在湘中作

秋日感懷八首

贈友

夜譙吳闔

送康小范之廣陵

寄侯記原

寄侯研德

哭友

秋夜篇和宏人聞夏兩兄

三婦豔三首

望遠曲十二首

贈祁奕喜

江樓晚晴懷丁繡夫

登穹窿山

贈宇三朱子

懷侯研德

寄遠

題穹窿道院

席上贈張子

上巳同丁繡夫禊飲

七夕贈車瑞香

秋日贈九臈和旣庭作

送人歸楚

寄懷姚子上

遺事

送甫草入都

贈舊李侍御伍戶曹李蜀人伍楚人也

題茂倫隱居

絕句二首

送字三歸楚

同旣庭敬生天一諸子及家聞夏集繡夫齋中時旣庭將有越行

九日舟行同旣庭繡夫兼呈敬生及家宏人聞夏

旣庭來江城忽爾臥疾詩以問之

偶成

送人還荊州

客夜有懷

送人之湖南

甫草都中歸賦贈

送人歸秦中

山齋晚眺懷朱子蓉

擬唐人送宮人入道

古意

春遊

柳絮

送宋旣庭之浙中

湘水曲效齊梁體

夜集贈余澹心

贈袁文生黃平子

與舊史

虎邱題壁二十絕句

擬古後雜體詩

卷六

詩五

謝吏部朏省直

王甯朔融遊邸

江記室淹楚望

梁簡文帝綱閨思

梁元帝釋述懷

沈特進約三日

范僕射雲貽友

邱中郎遲宴別

柳吳興憚擣衣

庾度支肩吾侍宴

何水曹遜示寮

蕭東陽子雲望春

虞常侍羲北伐

吳朝請均春怨

徐內史悱酬友

劉祕書孝綽歸沐

劉庶子孝威咏月

庾開府信咏懷

陳後主叔寶禊飲

徐僕射陵春情

沈侍中爛自傷

陰常侍鏗送別

張散騎正見汎舟

江僕射總羈思

魏特進收喜雨

盧武陽思道贈別

李內史德林消夏

隋煬帝廣塞宴

楊楚公素山齋

薛司隸道衡酬憶

秋笳後集

卷七

詩六

撫順寺前晚眺

經灰法故城

奉贈函公五十韻

送人從軍

贈秦州李生

陪諸公飲巴大將軍宅

送人之羌突里兼柬陳子

讀張坦公先生所撰徵音集却贈

張坦公先生談甲申歲河北討賊之事感賦
酬陳子長七夕見懷

浚稽曲

上巳奉陪都統安公遊飲西山十韻

贈陳生昭令

同林生夜宿淨公房時林來自咸鏡

送人還蒙古

冬夜伍謀公齋同錢德維作十韻

同陳昭令過西山蘭若十韻

與友人夜飲却贈

送金譯使之朝鮮

贈陳蓉旬三首

再贈孔公

長白山

上京

擬唐人謝真人仙駕還舊山

送人之平遠

王昭君

夜宿

沙林同友人登完顏故臺

會寧道中有古墟墓賦此弔之

送巴參領之挈洛

三月十二日河上口號

奉贈封山使侍中對公

贈滇令巴郡葉明德四首

咏鷹

奉贈大將軍巴公

奉贈副帥薩公

繭虎追和梅村夫子

猿鶴

蟬猴

贈陳昭令二首

觀獵贈陳昭令

獵後再贈昭令

都統郎公奉使塞外賦此奉贈二首

送人至鴉青江

送陳昭令之兀喇十韻

春暮江上凍解同諸君放舟至白崖口賦示十韻

奉寄安大將軍二十韻同錢德維作公以寧古副帥擢鎮奉天

寄顧梁汾舍人三十韻

雜感二首

讀古人詩有感

混同江

擬唐人御溝新柳

贈陳春甸十韻

郎公將還京師賦此奉送

奉酬徐健菴見懷之作次原韻

集成侍中容若齋賦得柳毅傳書圖次俞大文韻四首

春夜聞絃索限琴字

咏史

月夜

補遺

李侍御枉駕因留小飲

壽郭明府

送丁泰巖晉秩開府之任湖南二十韻

明妃曲

咏籠鷹應教

戲贈

和凱之送令兄侍中扈從之作

贈葉長民

秋筵集雜著

卷八

表

擬久旱禱雨天壇甘霖協應賀表

序

方與三其旋堂詩集序

孫赤崖詩序

慎交二集

書

戊午二月十一日寄顧舍人書

與計甫草書

又

秋笳集卷一

吳江吳兆纂漢槎氏著

賦

春賦少作

伊漢律之代謝。啟春序之繁昌。望山川之淑景。舒亭臬之艷陽。隄灑灑而烟渺。野萋萋而碧芳。絲繞枝以被麗。風轉薰而承光。桐華綺岫。蘭葉銀塘。貽粉蝶於珍卉。隱綿羽於高楊。惜景光之易邁。念憂樂之無方。撫九春而永望。憶千里而增傷。故雖風物同候。而歡愁殊變。至若長樂深宮。昭陽別殿。節徙百華。晝餘六線。晶屏開鸚鵡之樓。珠綴下鴛鴦之幔。樹綺合而霏微。草星離而蔥蒨。花明太液。元馭初飛。柳暗宜春。流鶯乍轉。於是咸陽卷衣之女。扶風辭輦之姬。沈淪永巷。徘徊履綦。怨銅龍之屆晚。勞銀箭之更移。敗金鋪而凝睇。涉珍臺而蕩思。柘館空兮青苔積。蘭林寂兮碧草滋。望翠華而不見。聽鳳管而長悲。去復去兮春已暮。怨復怨兮君不知。若乃貴主芳園。徵侯甲第。西京青瑣之家。南陽綠綈之地。循碧檻而遭迴。俯金堤而容裔。引鮮飴於綺疏。下元陰於玫瑰。爾乃徵霧縠。命雲翹。試羅衣而登茵閣。張黼帷而照蘭皋。游鑣乍倚。箏柱新調。駐流雲於歌扇。矜結風於舞腰。指景物之貽蕩。瞻池館之迢遙。翠袖揚兮絲管合。朱顏酡兮

羅綺嬌。至如承恩小侯。期門公子。更衣雕轡之傍。斷袖金屏之裏。亦復怡情暇日。遊目芳時。出蘭池而走馬。入槐里而鬪雞。結茱萸之麗帶。被蒲桃之賜衣。溫皋草淺。小苑烟霏。送珠丸於文羽。炤綠幘於春枝。遙指宜年。斜經鄂杜。開金埒而塵空。響玉珂而烟驚。陳王飾瑪瑙之鞭。衛尉碎珊瑚之樹。望芳郊之遠春。屆狹斜而欲暮。若乃女桑初展。條風始曛。頰陰曜景。細葉垂芬。則有燕關薄婦。代郡佳人。學歌北里。習舞西秦。畫修娥而黛淺。梳墮馬而鬢新。念八蠶之已熟。知三眠之欲分。爰覲粧而命侶。漫提筐而嘯羣。瓊鉤宛轉。珠繩擾弱。條冉冉兮遠揚。葉飛飛兮稍落。袖淺摘而香霏。腕頻移而羅薄。值使君之迴鑣。逢參軍之行藥。請交佩兮目成。贈搔頭兮心諾。復如妾居洛水。君戍真顏。瑣窗獨掩。迷迭空然。能流黃之夜織。晦錦隄之晨妍。草積墀而汎綠。花臨砌而含烟。玉關無極。金河帶天。貽待女兮何處。佩宜男兮幾年。自征夫之戍久。泣空牀之獨守。游塵晝飛。苔鏡春厚。章臺之劍空存。隴西之鏡未有。悲橫笛於郭超。寄異香於韓壽。對深閨之落梅。憶關山之折柳。又若河陽愛妾。安豐字卿。珠龍去。貝錦讒成。徒悲蕙晚。空怨蒲生。掩羅茵而麝歇。撫玉軫而鸞驚。攬芍藥而生悲。采蘼蕪而沾臆。屏宛轉兮晝長。帳萎蕤兮春寂。愁縈玉燕。恨望青驪。雕胡薦兮誰御。溝水流兮不歸。君聽下山之曲。妾依織素之機。復有送客東門。傷離南浦。緹帳宵懸。金羈曉聚。度楚曲而增哀。對秦箏而獨撫。依依春草。浼浼春流。覆露桃於玉道。低烟柳於銅溝。蕙路長兮紫艾馬。蘭江渺兮青翰舟。去故鄉而遠逝。指往路而離憂。容與征軒。逶遲去轡。掩玉筋兮寶御。驚贈金鞭兮行塵晚。草懷夢而情長。山遂枯而客遠。知移柳之何年。信采蘭之不返。亦有飄搖海筮。充戈工尋。冀中剛

則交州遠竄。趙景真則代郡長沈。莫不對落花而橫涕。聞歸雁而摧心。已矣哉。胡春物之喧妍。信芳年之
娟好。嗟余志之靡常。獨逢春而心悄。攀柳枝而涕滋。指棠梨而怨曉。潘中郎之徘徊明鏡。徒驚歲華。魏司
徒之遊獵春山。空悲年少。佩楚客之叢蘭。問仙人之別島。探五嶽而長辭。汎九烟而終老。乃爲歌曰。江南
芳芷兮色以陳。紅顏一去兮沾羅巾。歲歲春風南陌上。惟有垂楊踈地新。

秋雪賦

吳生既竄旅於龍山之下。戚兮無惊。悄兮多暇。抱孤迹於寒郊。眷羈心於秋野。於是青要已屆。素商未闌。
熊環西蟄。雁厲南翰。先冰濂而夜結。玉露皓而朝溥。爾乃眇懽緒。愴憂端。倚拂廬以淒日。對服匿而流歎。
憶江皋之餘煖。怨邊候之早寒。俄而九關欲黯。千里無色。魚雲斷山。雁沙鳴磧。天濛濛以將低。日曛曛而
如沒。替埃靄於遙空。積風威於廣隰。霰警屑而稍飛。雪翻颺而遙集。匪窮陰之窈鬱。起嚴氣之氛氳。乍連
山以轉霧。忽縈空以憑雲。始嬾娟以構雷。遂雜沓而橫氛。混玉門兮並色。覆金河兮莫分。於是遙峯失紫。
叢林掩黛。日冷金支。雲收羅帶。殺蟲響於陰崖。凍波文於元瀨。薄涼鶴兮增寒。入迅商兮振籟。淒兮瑟瑟。
爽兮霏霏。入帳凝華。悞鶴關之曙啟。停林結葉。疑鸞朔之春歸。綿烟壑以含縞。合雲海而通暉。迷征馬之
野牧。慘寒鵬之夕飛。悲青桂之爽節。歌黃竹之哀辭。既乃燭龍將暝。城烏漸息。山返樵歌。林歸獵客。霜依
夕而彌嚴。霧橫天而轉急。壓土銜兮沈烟。灑蘊牆兮緣隙。飛六出而未成。翻三襲而爭積。助紅樹之秋聲。
繡緯河之夜色。望已斷兮還連。謂將開兮忽及。未睨柱而玉殘。似卷綃而珠泣。冒蓮衣兮墜紅。點蘆花兮

借白。磧何遠而非銀。臺何高而無壁。蕭條兮瑾戶。爛漫兮凝階。金筇寒而葉肥。鐵衣照而鱗開。逐邊風兮
響蕭瑟。鑿漢月兮光徘徊。葉亂聲而競下。雁孤影而遙來。眇平原之曠莽。惟積雪之崔嵬。若乃氛昏半收。
夜景遙廓。風斂天霄。雲澄海壖。月抱暈以東垂。河含星而西落。荒雞喔兮伺晨。霜禽嘹兮警漠。凜淒藹之
凝嚴。鏡澄暉之昭灼。山千疊兮少人民。野萬里兮無城郭。氣懷慄兮侵衣。色晃朗兮盈幙。樽琉璃而不懼。
攬褐裘而怨薄。笛吐哀以獨吹。泪承睫以雙落。鄉夢遠兮空歸。邊心憤兮交作。候已昧於秋冬。心何分於
苦樂。撫秋朔之如斯。知天施之未博。彼夫南國王孫之墅。西京戚里之家。梧承檐以稍下。菊羅砌而初華。
幕曾軒以楚組。代纖綵以吳紗。愛秋颺之送爽。憐秋夜之方賒。綺羅紛兮樂未已。簫鼓喧兮月欲斜。豈知
江接烏龍。城遙元菟。飛雪嵯峨。會冰迴沍。遷客之辛勤。塞垣之寒苦哉。悲來如何。摧心自多。援筇攬調。爲
秋雪之歌。歌曰。邊風起兮朔雪飛。雁遑寒兮度欲稀。關山遠兮誰與歸。心懷鄉兮空自知。龍沙雪色秋如
此。腸斷高樓舊寄衣。

羈鶴賦

伊胎禽之皓麗。超羽族而擅祥。養南琛於火次。毓西氣於金商。性玉清而內蘊。儀瓊潔而外颺。翮羽宣嶽。
接翼歸昌。睨元睛而燭月。皎素翰而凝霜。吐火齊於驥首。縹水穀於修裳。頰丹華於花映。鬣髮采而焗揚。
矯矯高鶩。軒軒遐鷺。秣芝田而弄姿。飲溶溪而顧步。激曉唳於霜辰。婉秋心於烟路。指霄壖其何央。豈人
寰之足慕。連軒兮紫蓋。馴擾兮青田。朝容與兮瑤岑。下夕棲時兮珠樹邊。還丹作帳中之使。挾彈騁樓上

之仙響橫秋而益厲。貌凌漢而愈妍。暫揚翻兮萬里。乍舒息兮千年。鄙白鷗之陋姿。嗤黃雀之弱翼。謂九
臯兮迴歸。詎一日兮我逼。仰雲嶠而猶飛。恣風翎而未息。豈知范機密賦。虞羅潛織。頓樂野之高置。理桓
生之輕弋。鍛雋翻於中霄。委微軀於下澤。碎霜衣之襍穢。摧藻質之淋滲。魂魄儼兮誰語。吭織殺兮空吟。
屈此雲裔之侶。爲君塔下之禽。爾乃斂遙情。絨夸節。去寥廓。就樊綯。燕雀長偕。鸞皇永別。餐雁稗而未充。
共雞棲而任褻。悼故巢之星乖。悼孤雛之雨絕。對淒影而增悲。送哀音而沾血。華表集兮何期。琴絃響兮
淒咽。彳亍荒途。摧藏幽垤。頻驚遙夜之寒。空怨今年之雪。於是冬灰欲徙。秋箭將窮。露凋華薄。風勁寒樓。
幕翻翻而辭燕。渚沈沈而集鴻。視空塘之謝綠。睇迴林之罷紅。翹清趾而清叫。迅修毛而欲狎。抱新愁於
池畔。聽舊侶於雲中。情眷眷而懷歸。色淒淒而獨苦。旣傷肌於網羅。空托身於庭廡。憶妙舞之吳城。思仙
吹之洛浦。緬軒翥兮無由。惟羈棲兮遑悔。寵未遇於乘軒。殃何罹於碎鼓。感淒氣兮長懷。結悲風兮自溯。
霜肅肅兮夜庭。葦梢梢兮寒渚。形曜雪兮誰憐。志凌雲兮何補。彼東門海鳥。對鐘鼓而含辛。北風代馬。亦
戀土而傷神。矧茲鶴之清迥。乃摧落於荒榛。恐歲年之逾盡。怨雲霞之莫因。眷天邊之風族。羨沙上之鷗
羣。諒委軀於匪類。亦奚志於高嬰。豈窮生之足樂。胡介性之能馴。倘更豐其六翮。當橫絕於九垓。

蘭賦

選卉族於幽記。惟斯蘭之獨靈。蘊澄華之秀質。含迴介之遐情。微服媚於燕夢。擅奇芳於楚汀。芬入山郎
之握。種傳侍女之名。詎競時而逞豔。每屏幽而自馨。爾其紺蕊懸羅。素苞切玉。舒碧葉之修靡。擢青跗之

織綺。蒂含縹。以冰鮮。花點賴。而星燭。紛書帶之頻銜。森瓊枝之上矗。乍垂的以擲丹。不結房而吐綠。羅生
修坡。叢被曾谷。鮮雲結陰。微颺送煥。旣芊蔚於溫臯。亦葳蕤於丹麓。並威喜之仙芝。邁曾城之靈木。斐披
媚景。澹淡含烟。託山楹而延藻。蔭澗戶而垂鮮。溥露華而色淺。承日影而香傳。譬羣翡之棲岫。似明霞之
曜川。凌衆穢而未沫。操孤芳而自妍。於是璇閨麗人。金屏媚子。蟬鬢方梳。鳳琴罷理。煩炎景之赫曦。愛芳
花之旖旎。爾乃培以元壤。承以玉缸。柔柯不擾。修葉成行。布綺錢而增媚。列錦石以疏芳。茗粥沃而膏潤。
油檀蘸而恐傷。去巖幽之岑寂。來寫目於君堂。樓陰散暑。池彩迴涼。暖香風於珠幔。媵幽質於瑤房。及夫
日下窗梧。風低軒柳。倦理羅紈。未淹杯酒。下曲閣而蕩思。步修欄而垂手。愛青青之入佩。憐菲菲之襲衣。
屢縈環於織指。長延玩於遙帷。香來輕重。影度參差。舉羅袖而淺摘。綴羽釵而半垂。忖雲崖之微種。得移
根於玉池。雖荷君之擘採。恐零落之無時。愧未植於當門。亦何勞於翦伐。傷媵子之文魚。就摧芳之鳴鳩。
律中商而欲淒。霜賈寒而增冽。條摧曉霰。色瘁秋風。將隨蕭艾。孰辨芳叢。嗟國香之萎絕。竟莫異於孤蓬。
雖委根於中路。尙延憶於珠宮。於是逃虛處士。聞而嘆曰。秋蘭榮何晚。憔悴委嚴霜。新翠已無色。故畹尙
餘芳。早知青女能相負。悔不長垂湘水旁。

萍賦

步修渠兮。俯澄波而游目。覽蘋萍之微植兮。亦寄身於水屬。體汎汎而靡托兮。色田田而自縟。同石髮之
鬢髮兮。謝澤芝之靈臚。爾其幽茂湍中。澄羅水側。漠兮鱗被。菱兮雲織。表沈淫兮翠鮮。裏參差兮紫飾。敷

細葉而無根吐纖滋而成實巧憑浪以繁盈輕從風而疎密小圓文於莢錢混微姿於蟬翼三輔善其色青五月傳其華白羌聚散而無心乃沈浮而有適。瀾漫如拭。點蕩還來。染金塘之細草。雜瓊岸之輕苔。垂纖綸而半捲。冰修鱗而乍開。或值隈而斯滯。或觸物而遽迴。惟飄蹤之若此。亦何心之可猜。若夫灑木紅泉。幽篁元澗。餘霞始收。光風未轉。息細響於潺湲。靜文漪於凌亂。遂冒渚而烟稠。爰藻川而雲蔓。匝碧羽之叢叢。點紺羅之片片。及夫烟生極浦。日黯長河。屏翳增扇。冰裔化梭。雨憑憑而激水。風騷騷而送波。川無憩鱗。林靡靜柯。乃競糾於渤澥。共紛擾於盤渦。錦殘碧荇。雪亂青莎。嗟質輕而易蕩。委鯨濤而謂何。復有白鵝翔羣。紫鴛擾侶。蘋蠶紅衣。翠綵繡羽。下斷岸之春陰。汎方塘之曉霧。競戲廣而灑珠。並浮深而浴素。牽藻差池。喙流顧慕。圓吭啄兮碧分。修領刷兮綠破。至如秣陵秋瀨。橫塘夜川。綠菱始發。紅蕖乍鮮。遠紫房而爭布。縈縹幹而駢田。逢姣姬之倚楫。值妖童之採蓮。沾碎綠於皓腕。亂浮青於綺船。龍文動兮開且合。羅衣拂兮斷復連。至其措形空水之涓。散跡荒江之表。任漂寄其何之。還雍容以自矯。乏纖莖以自持。歎孤生之易擾。似逐臣之去國。同遷客之辭家。漫銜悲於故壤。空矚目於浮查。萍托水而靡甯。士遠時而失據。嗟人物之異心。胡悲歡之同遇。睹斯草之所如。徒慷慨於予慕。彼夫菜美崑邱。血變淮南。流長劍之耿耿。美雲鬢之峩峩。乃好奇之殊觀。非幽人之所覩。與汀葭而並瘁。共池荷而詎慙。雖未馨於君廟。終呈潔於幽潭。

長白山賦并序

長白山者。蓋東方之喬嶽也。昔臣袁宏有言曰。東方萬物之所始。山嶽神靈之所宅。我國家肇基震域。誕撫乾圖。景歷萬年。鴻規四表。則茲山者。所以昭應皇輿。合祥帝室。與有巢之石樓。少典之軒臺。同煇耀於方載者也。皇上聖文臨宇。神武膺符。慶洽人祇。化隆海嶽。仰欽祖德。報禮神邱。爰詔侍臣。致崇禮秩。牲璧儷於羣望。懷柔及於百神。瑞檢雲陳。穹壇星麗。煌煌乎聖世之盛儀。瑋瑋而軼漢祀矣。夫南山薦馨。班固以小臣作頌。西嶽展禮。杜甫以布衣獻賦。草莽微臣。竊附斯義。乃作賦曰。

猗茲山之峻極。眇羣嶽而獨尊。體青瑤以出震。標皓靈而耀坤。揭龍荒而作鎮。頽鵬溟以爲門。參二儀兮永峙。表三成兮莫倫。徒觀其大勢也。則巖辭替蓋。穹窿噴映。竊遶嶙峋。壇漫莽。迺漠漠以橫波。峒嶢嶢而極上。距遼碣。賸朔壖。騎挹婁。睨朝鮮。亘喬基於千里。造會椒於九天。赫兮無儔。峭兮迴拔。嶺輪糾以爭互。巖巋巖而相峴。峯千仞兮縞曜。壁萬尋兮瓊潔。鬱騁險兮橫霧。諺負高兮埽覽。五結切。洵東極之神隩。距西嶠之可埒。爾乃循覽四麓。攷其周綴。爰有黑松巨林。馭蔓踰邃。狽狽天有極。縈地靡際。旣賸坂而連延。亦籠山而羅嶺。根攬侷以鱗羅。葉綻獵而羽翳。挈莖含髓。以鬱蒼。攢柯穹霧。而叢倚。翳兮沈沈。黶兮黶黶。歛陰火於空心。蹙陽波於槎槩。叶羊至切。乍頓道而欹臥。忽摧壑而側植。叶直吏切。信亥步之未跡。知禹築之莫暨。自山麓至牛山。皆黑松林。亘三百餘里。不見日月。樹根相糾如網。地皆深淥。馬行七日乃畢。於是黛凝複嶂。烟暝虛嵐。森梢陔互。埒嶺斷崑。景掩暉兮罕曜。塗溼澗兮增湍。市層陰於遙嶽。髮荒徑於修

披勁翮。哢吭鞞。奮翰獮。或命儔於杪顛。或接巢於枝格。隣金眸兮高睇。厲青骸兮下擊。緇采賴輝。殊材異質。喧聒相驚。淪躍自驚。鼓芻距以增響。毳羽毛而成羣。極翔羣之詭錯。咸沸卉而斯集。若夫魃魃之儻。昆口之屬。伏魑長嘯。豪豨振于。鷹鸞昏眊於積岨。熊彪睽矚於叢木。豺獍斷斷以猛噬。玃穉驚透而紛逐。般首勁角。圍題從目。昏噪晨响。風馳雷獸。慄林振壑。般巖賦谷。至乃青暉黃魴。華貂文豹。挺修毫之溫潤。含雕采之煒烈。豆目暘睽。麥髯狎獵。棲迹曾冰。膏蹤盛雪。竄木末而騰躡。穴巖覆而競捷。羌托體於寒阪。疇効珍於華闕。伊奇類之夥够。嗟難得而殫說。爾乃林徑欲窮。近蹊半墳。轉千盤而漸高。出九折而逾礙。紆蹇產。竦嶮峴。豁修渚。響湍瀨。縈濯龍之滄淵。飲納鷲之雙派。水名濯龍。浩大小納鷲二河。殷雷地底。倒景天外。駭河流之凌薄。劃巖坳而訇磕。棧鬱盤於迴溪。路匪廢於嶮峴。澗凝空兮誰涉。崖踐虛兮儼對。於是豁閉直裂。嶒嶻如憑。抗術阡於鳥際。超軌躅於雲層。邈半漢以上躋。軼隆巔而究升。周步山極。肆目巖陘。曠若砥原。坦若廣庭。纖條不竦。殊榛罕莖。寒蕪莽莽。石道冥冥。何嶒嶮外峙。而唐壇內平。山頂極平坦。無樹木。惟荒烟蔓草。滿日縱橫而已。爾乃羣巒結瑤。以峻起。千巖削玉。以攢立。額砥含皓。以堪垣。崢嶸繚素而叢襲。筵五色以相煥。綿百里而環羣。類瑤臺之偃蹇。宛瓊山之崩芳。石崖高七十丈。白如瓊玉。四環山頂。廣袤八十餘里。仰重霄兮可捫。俯下方兮無極。互陰晴於膚寸。攬星辰於盈尺。伏岑巖而返眺。訝雷雨之下黑。爰有千齡之冰。太始之雪。嵌空峭窞。并凌摩。六尺皚皚。表丈嶺嶺。迎素秋而競飛。涉朱炎

而自冽。嶮壑森淒。以月鑿。峽嶠烟晃。而鏡徹。乍消長於新故。疇單究其融結。紛銜耀兮遠映。何吹律兮可熱。從山趾至顛。高二百里。其上冰雪叢積。歷夏不消。爾其混同之本。鴨綠之源。飭爲神池。以宅乎其間。池在山之極頂。形如豕腎。縱餘五里。橫八里。北流至松花兀喇。入烏龍爲混同江。南流至朝鮮爲鴨綠江。一統志云。池廣八十里者。謬也。曾瀾廣濶。靈液淪漣。振以曲碕之巉岬。繚以襄岸之駢田。含靚如拭。積明若空。乍風披以激灑。倏霞蒸而潰洩。擊翠啟鱣湍之徑。躡雲構蛟人之官。爾乃疏隘陬。穴險陟。跳潛沫。駭奔深。洎潰阿而瀉瀑。雪冰巖而頃溶。徂南驟北。趨滄聚飢。消靈源於千頃。淪神委於二江。叶姑紅切若其噍寶之所潛演。穹虛之所瀆激。灌似碓投。洞若機疾。並騰傾而灑珠。遂奔揚而綴壁。羣流旣濞。四派乃馳。灑灑崇岑。喧逐峻岐。颯沓雨集。澈冽烟飛。挂流曾碧之表。淪波空翠之隈。倒銀潢而半瀉。矯皓蜺而迴飛。四月間。池水及石罅凍泉先開。其所出之水。凡四派。穿白石崖而下。挂流百丈。擊若驚雷。於是澹泞安翔。蜃鱉四會。漾漾混濤。澎澎振瀨。抑魚龍之餘怒。集大坻而爲匯。潤兮永指。晶兮徐邁。出乎松花之陬。注乎烏龍之外。四派之水。至臨墨。隨呀庫。匯爲一流。以入於松花兀喇。所以宣天綱之含布。壯朔野之襟帶。若攷其瓌奇之所窟宅。珍瑋之所景彰。則夜珠流照於素波。蘋玉摠采於青岡。人蓐抗莖於椴陰。良楛挺筇於松陽。人參生於椴樹之陰。石崖外。松林極日。其間環生楛矢。卽肅慎氏矢也。靈趾騁螭而容與。羽人撫鶴而棲翔。畢山經以撰異。莫茲嶽之靈長。相傳其上有仙靈往來。擅射麋鹿者。卽雲霧迷徑。至其出納望曦。

紛聚頓挺拔之地。軸俛巖峩之天柱。故能上當辰曜。仰襯帝居。抗基卓犖。勢扶輿路。蒼門而表神宅。並青岱而闢仙閭。赫彤雲之畫聚。焯紫氣之晨敷。孕造夏之玉字。識臨代之寶符。啓潛躍於聖祖。臻景鑠於皇圖。藏瑤牒兮可煥。涌金精兮詎誣。瑞我清兮億載。永作固兮不渝。

竹賦并序 童子時作

閒遊別墅。見有竹數竿。臨池獨秀。而托根荒徑。延賞無人。僕感幽質之飄搖。憐貞姿之蕪沒。乃設爲子桓季重之事。以諷其詞曰。

魏太子從容多暇。言遊西園。御華輅。靡朱軒。馳武賁於先路。托文學於後轅。爾乃迺惠風而揚葭。承清雲而轉旆。度蘅薄之遭迴。指蘭塘之如帶。於時池臺綺合。帷幙珠連。珍卉被麗。修竹嬋娟。繞亭皋而蔭景。夾曾闕而垂鮮。太子乃感湘流之怨歌。撫楚潭之逸曲。顧賓御而長懷。招季重而進牘。季重於是蹠而稱曰。臣聞坤靈誕育。庶族繁生。見篔簹於幽記。表篔簹於祕經。結根水澁。晞幹山岑。抱偃蹇之姘節。含萋蒨之幽心。出炎洲而獨立。臨江介而流音。織桃枝之珍簾。傳雲母之怪琛。仙人掃陽嶼之石。烟客擅羅山之金。乍成船於百丈。或如甕於十灣。徒觀其黛色參差。翠筠窈窕。延華月而玲瓏。翳流雲而夭矯。散空碧於元壘。下浮青於綺沼。靡旒無定。嫵媚自持。苞新潤粉。籊細含滋。積雪霏兮冬荷繁。景麗兮春遲。若其抗莖公子之庭。列植佳人之室。上泠泠兮削成。下離離兮如織。於是未下葳蕤。初舒屈戌。瓊鉤卷兮臨花。綺疏空兮停日。見繡篋之森梢。對縹枝之乍密。輕颺肅兮結元陰。暮雨封兮疎翠滴。復如幽茂山椒。宗生烟路。俯

碧澗之陰岑。交蒼厓之紆互。涼葉棲霜。修篁承露。鎖岫竊於冬春。嘯清猿於朝暮。紫花落兮無人。素筍抽兮誰護。結海山之珠寶。青鳥空來。拂江南之石盤。洞簫時悞。若乃曲臺依夕。景昃明羅。白露警鶴。素月驚鳥。寫薄暮於綳箬。曳輕烟於綠柯。爾乃影亂珠罍。聲傳翠幌。橫瓊砌而增涼。拂金鋪而助響。秋徑夕兮猗靡。寒塘靜兮蕭朗。至其蒼蒼延秀。飄飄蕩姿。泛微霜於曉葉。聽歸風於夜枝。起騷人之獨感。動山客之相思。是以質謝暄妍。氣分秋朔。笑十蘭之徒芳。悲三秀之易落。送短羽之羣棲。望長離之永托。雖移根於玉階。終寄心於雲壑。太子於是綢繆浩唱。諷采妍辭。披廣殿。俯華池。出絳樹之雙曲。進翠羽之交卮。命吳生於密譙。長接席而不違。

陶彭澤無絃琴賦并序

山右吳公來蒞茲土。春流飲馬。還投瀨上之錢。曉閣觀魚。早辨沙中之獄。訟庭雀下。官舍松清。豈獨北地豪家。毀茲棗樹。遂使西川女子。棄彼芙蓉。况復從容多暇。儒雅怡心。吳季重之在元城。無妨文墨。潘黃門之居懷縣。不廢詩歌。追五柳之高風。撫一彈之遺操。爰進童子。用賦斯篇。愧非園令之工。敢薦正平之作。其辭曰。

伊有晉之徵士。永埋炤乎柴桑。緬長沙之遺烈。追義熙而自傷。斂鸞翮以卑棲。逝鴻羽以高躔。遡清風而獨遠。鬱明霞而不揚。願素琴兮興感。意飄飄而自昂。爾琴之爲質也。則龍門飛霰之枝。馬嶺崩霜之幹。托瓊嶽而孤生。據丹岑而絕漢。含繞梁之清哇。蘊號鐘之哀散。爰有離子之徒。王爾之傳。循山獨採。越壑相

求。剖陰莖以薦法。翦陽柯以雕鏤。采茲良質。制爲雅琴。以獻君子。其聲悱悱。豈知六朝逸侶。五柳高人。悼
廣陵之永絕。嘆田連之不存。棄八蠶而莫御。屏獨繭之橫陳。於是淥水空傳。流風徒結。旣收逸響。誰聽嚴
節。輟繁響於飛龍。斷游絃於明月。逍遙空撫容。與自怡。五色神蛾。不縲仙人之繭。一雙春燕。長辭愁女之
絲。荀季和之鳳凰。空含玉軫。李司隸之孔雀。謾飾金徽。信無聲而有意。何至晉之可悲。若夫流鶯始飛。條
風乍起。芳林結陰。微波成綺。爾乃巾白袷。攜烏几。命遠公於匡山。嘯宗生於江沚。拊茲琴兮娛心。豈操暢
兮睦耳。復如東皋。晚晚北戶。迎秋黃花夕秀。白露晨流。荊州唱野鷹之曲。玉關寄旅雁之愁。於是倚杖徘徊。
臨流顧步。見離獸之東南。睇歸雲之不度。悲哀彈於霜林。感遺操乎秋路。抱空質而長歸。收衆音於秦
素。豈知荆王曲裏。珠柱淒涼。趙后宮中。玉螻隱互已哉。乃爲歌曰。春風澹蕩。春水深。思君不見多悲心。應
知陶令遺徽在。栗里風流自古今。

秋笳集卷二

詩一

曉發撫寧題逆旅壁

長宵鼓角度嚴風。泱泱烽樓曙色通。客夢五更驚櫪馬。征途三月逐歸鴻。斷雲城堞臨邊迥。殘雪關山曠海空。莫道盧龍猶在眼。異時南望是遼東。

山海關

迴合千峰路塞垣。漢家曾此限中原。城臨遼海雄南部。地枕燕山控北門。寂寞雞鳴今鎖鑰。淒涼龍戰昔乾坤。高臺誰憶中山業。遠目蒼蒼白草昏。

關上留別潘守戎代方釐事作

塞天萬里送征鞍。意氣逢君欲別難。俠客軍中傾灌孟。故人門下識任安。望鄉臺迥邊雲斷。姜女祠空海氣寒。明發驪駒分手後。榆關風雪竟南看。

出關

邊樓回首削峰岫。筆筴喧喧驛騎塵。敢望餘生還故國。獨憐多難累衰親。雲陰不散黃龍雪。柳色初開紫

塞春。姜女石前頻駐馬。傍關猶是漢家人。關前有姜女窰夫石。

榆關老翁行

榆關酒樓臨大衢。征人日暮行駐車。鹿裘老翁鬢成雪。夾轂相逢問里閭。乍聞吳語三太息。坐我樓頭話
疇昔。自云家世本吳中。住近張王舊宮側。少年追逐冶遊場。破產徵歌意無惜。沙家槍稍冠江南。學得梨
花推第一。技成好作關河遊。販繒幾度來邊州。燕姬十五芙蓉色。彈箏夜夜酣高樓。一曲紅綃醉中擲。囊
空典却千金裘。三載邊庭履霜露。飄搖褻褐誰相顧。途窮不忍到鄉關。却向軍中應征募。金羈翠氍繡螯
弧。名隸渡遼第三部。關前上將霍將軍。遣向松山守烽住。孤城接鬪無時休。鐵甲中宵帶冰臥。老邊牆直
長城隈。梯衝百道如山來。寧前列屯畫城閉。旌旗黯慘紛黃埃。雄邊健兒十三萬。鼓聲欲死弓難開。磧西
降丁最翹健。日暮分營夜催戰。吁嗟萬騎無人回。射盡平州鐵絲箭。曙光曛曛海生綠。戰血無聲注空谷。
嚴霜如刀箭如蝟。欲上戎鞍淚交續。堅城既墮將軍降。幾部殘兵向南哭。相隨散卒臨渝城。橫刀更隸龍
驤營。倏忽長安易朝市。關門不用防秋兵。從此飄零脫軍伍。種豆鋤葵學農圃。且將衰齒托雞豚。幸免微
軀飼豺虎。昨年有客來燕京。傳道江南亦被兵。故國他鄉盡荆棘。窮黎何處還聊生。伊昔姑蘇城畔住。門
前小店臨江樹。半生鬚戍塞垣秋。夢斷吳關舊行處。今日逢君遼水北。被褐驅車欲安適。白頭邊語久侏
儻。重聽鄉音涕橫臆。悽惶嶺外北風哀。莽莽邊沙路何極。沽酒邀君君莫辭。天涯相見且相悲。莫嫌憔悴
窮邊叟。猶是吳趨市上兒。悽惶嶺在關外二里旁。有姜女石。

次前衛

落日莽茫茫。嚴城列雉長。地形環漢塞。山色接遼陽。風勁沙恆響。春餘草乍芳。關門今不戰。萬里盡耕桑。

同諸公登中後所戍樓

昔爲荒戍駐征輶。縱目烽樓堊色遙。萬里川原迷大漠。百年亭堠識前朝。平沙暮捲山頭樹。落日晴翻海上潮。倚堞却尋南首路。漢關迢遞已雲霄。

錦州道中登海邊舊保障臺上有傳烽桔槔

塞門東盡海天開。百戰猶存保障臺。偃革十年閒斥候。傳烽當日報蓬萊。龍山燒色連沙起。皮島濤聲蹴岸迴。却望元戎開幕處。斷垣零落使人哀。

塔山道中望海二十韻

馮高臨渤海。披遠瞰瀛壖。浩浩雄東極。茫茫控北邊。潮迴雲島失。浪蹴雪山連。空外應無地。波中或有天。稍分元菟郡。莫辨白狼川。洄洑連星拆。盤渦倒日懸。□□分萬里。宇宙失千年。樹隔扶桑近。津回析木偏。翳空鵬展翮。吹滌蜃飛涎。縹緲龜梁客。虛無鹿嶠仙。淚綃憐女織。驅石想神鞭。杳映陽霞紫。昏明陰火元。魚雲晴作市。蚌月夜揚鮮。萬象應難測。孤蹤任所牽。萍漂何倚托。梗斷孰延緣。征客槎空度。冤禽水漫填。欲沈徐衍石。難泛管甯船。鄉國思漁釣。關山愧播遷。金支甯可睹。玉佩竟誰捐。心共滔滔水。東流去渺然。

廣寧道中作

巫閭千嶂削芙蓉。走馬東來翠幾重。殘碣久迷遼日月。遼岑東丹王居此。毀垣猶記漢提封。射鵰舊俗爭馳獵。買犢新田早事農。共道廣輪今一統。朔雲十載罷傳烽。

登廣寧城望城外佛舍因同諸公却過

徙倚城頭極望長。雙林鐘磬遠微茫。淒涼古塞還僧寺。寂寞前朝只戰場。金井有基春草綠。石幢無字夕陽黃。却憐負羽邊庭客。重過禪扉意倍傷。

沙河道中

渡遼幕府已彫殘。傍海山川尙鬱盤。攻守十年誇保塞。廢興一代問登壇。營空鵝鶴青燐泣。冢失麒麟白草寒。露祭獨憐遺老在。秋風磧路哭戎鞍。

次沙河砦

客程殊未已。復此駐行裝。世事憐今日。人情怯異鄉。月臨邊草白。天入海雲黃。莫恨關山遠。來朝是樂浪。

瀋陽旅舍賦示陳子長

西風城畔夜烏哀。積雨荒庭踏不開。匝地關山千里去。極天遼海一身來。文如劉峻終無命。憤到嵇康始悔才。舊業凋殘歸未得。望鄉何處更登臺。

贈赤公

憐君杖錫欲何依。寂寂花宮一磬微。欲使邊城傳白拂。却教漢法到緇衣。燈然鹿苑諸天靜。杯渡狼河雜

都歸。知是隨緣無遠近。不將遷謫擾清機。蒙古人多稱弟子者。

同陳子長坐氍帳中話吳門舊遊愴然作歌

遼城四月春風來。黃鸝啼樹梨花開。陳生邀我郭南去。笑騎鞍馬雙徘徊。沙場黯黯日將暮。半醉歸來解鞍臥。氍毹誰撥鷓鴣絃。彈作商聲淚交墮。憶昨故鄉百不憂。命儔嘯侶吳趨遊。裁詩每題白團扇。縱酒欲賭青羔裘。沙棠之槳雲母舟。美人玉袖搗笠篔。金窗銀燭月未午。清歌窈窕無時休。就中少年三五輩。徐郎顧子稱風流。獨孤側帽傾十女。正平搖筆凌王侯。百年行樂竟誰在。淒涼邊地傷離愁。只今相對休怏快。人生苦樂猶迴掌。隴西將軍困醉尉。邯鄲才人辱廝養。古來憔悴多名流。吾輩何悲棄榛莽。君纔弱冠我盛年。可憐淪落俱冰天。舊遊一別已如雨。陰關萬里徒含烟。寄哀欲托庾信賦。賞音空憶鍾期絃。金樽有酒且沈醉。何須惆悵風塵前。

同陳子長夜飲卽席作歌

豪氣君未除。長嘯輕遠遊。雖爲遼海客。不諱邊城愁。青絲玉壺銀鑿落。中宵坐我碧油幕。海風吹天星動搖。邊色橫烟月澄廓。倚笛頻驚出塞聲。銜林尙擬華年樂。黃龍東望沙茫茫。黑林樹色參天長。此行應痛永乖別。他時相憶徒慨慷。愛君且復飲君酒。庭樹搖搖挂珠斗。夢去難攀鶴市花。醉來聊折龍城柳。眼中萬事盡飄蓬。爾我安能日攜手。故園何處五湖濱。難後逢君意轉親。誰憐元菟城頭月。泣盡黃公壚畔人。將發藩中過子長。飲愴然有作。

日暮離心共黯然。相看涕泗酒杯前。最憐去住逢今夕。轉憶情親是昨年。地入烏龍雲接海。人過元菟雪爲天。與君萬里同羈戍。無那孤蓬更極邊。

撫順別孫赤厓劉逸民

邊程不可駐。杯酒暫相親。共此羈孤地。還成去住身。中宵遼海月。萬里塞垣春。明發單車別。誰憐絕域人。

發年馬留別瀋陽諸子

辭君更東去。回首見重邊。塞盡秦時地。山開徼外天。長歌哀午夜。遠謫痛丁年。縱有高秋雁。蒼茫信豈傳。

贈海南曾生

憐君從役罷登臨。鄉思猶傳越客吟。卓帽塵生人未返。青山霜落歲將陰。玉關征戍悲蘆管。珠浦音書怨蕪砧。我亦有家江水上。十年同恨塞垣深。

曉起

初寒山畔尙餘花。早起江頭未落霞。秋草郊原聞牧馬。曉雲睥睨度吹笳。書傳錦字三年淚。路繞銀河萬里槎。襦袂敝裘歸未得。幾回彈鋏歎無家。

城樓曉望

啞啞烏啼起戍樓。朅來登望思堪愁。山橫雁磧皆東下。江劃龍荒盡北流。金甲日凝千帳曉。畫旗風急六臺秋。征夫絕塞蹤難定。腸斷尊前玉腕脰。

過朝雞屯

連宵宿年馬。今日過朝雞。風壤行逾變。雲山望欲迷。沙虛留虎跡。樹暗聽烏啼。回眺懸鞍處。迢迢隔嶺西。

夜宿陰溝關有懷子長

信宿陰關戍。悠悠旅夜徂。春聲過磧冷。月色到邊孤。離夢還高枕。餘生且客途。蒼茫睥睨外。不忍聽啼烏。

陰溝關

重山千仞疊晴空。列柵當崖鎖鎗雄。牙帳別開龍磧外。岩疆更抱菟城東。數家烟火黃雲暮。一片牛羊白草風。去去敢傷荒徼遠。遼陽今已是關中。

高麗營唐太宗東征舊蹟

文皇昔日征遼海。此地高麗亦駐兵。想像六軍頻血戰。蒼茫異代尙殘營。黃雲磧斷行人少。白骨原空蔓草平。日暮江流風雨外。滔滔東去不勝情。

五日阻水年馬河

五日驅車度極邊。中宵移帳阻長川。波間不斷千峯雨。林上爭喧七澗泉。鐵騎風沙行戍日。錦帆絲管舊遊年。汨羅猶是江南地。始覺靈均未可憐。

贈陳心簡故深陽相公子也

白袷翩翩馬上逢。襟期憐爾尙雍容。王章有子稱遷客。李燮無家托酒傭。夢裏白門人萬里。愁中元塞嶂

千重月高。毳帳悲歌發。醉攬邊笳對雪峯。

四道嶺

懸流溪百折。東嶺樹千盤。不度重關外。甯知此路難。沙聲連雨急。嵐氣逼雲寒。日暮愁征旅。前岡且駐鞍。

黑兒逆河眺望

長河渺難涉。歇馬暫躊躇。地隔三韓外。人看萬死餘。沙陰低遠幕。草色上征車。竄逐前賢事。飄蓬愧未如。

早發尼失哈

繞帳笳聲促夜裝。明星欲落霧蒼蒼。征途咫尺迷孤嶂。殘夢依稀認故鄉。雪盡龍山三伏雨。風嚴雁磧五更霜。據鞍却望黃沙外。此地由來百戰場。

次了深河水漲不得渡賦呈方樓岡

兼葭一水霧初收。欲濟蒼茫少客舟。樹合雙崖迷塞路。雨添千澗引河流。蕭條甌脫秋先到。嗚咽琵琶暮起愁。總是播遷京國外。不妨此地更淹留。

七夕次喇伐朵洪

駐馬平蕪外。徘徊旅思長。河流秋淼淼。邊色夜荒荒。畫角千峯月。羊裘七月霜。世途吾拙甚。不敢望銀潢。

喇伐道中作

平明吹角起征鴻。又逐戎鞍遡朔風。秋草關山人獨去。寒衣鄉國信誰通。龍沙迺出三邊外。烏道斜懸萬

嶺中千載主恩良不薄。崔駟竄處是遼東。

小烏稽卽前史所稱黑松林也。

連峯如黛逐人來。一到頻驚暝色催。壞道沙喧天外雨。崩崖石走地中雷。千年冰雪晴還溼。萬木雲蘿午未開。明發前林更纒絕。側身修坂倍生哀。

大烏稽

朝辭石棧亂雲巔。暮宿蒼林萬仞前。灌木帶天餘百里。崩榛匝地自千年。棲冰貂鼠驚頻落。盤樹熊羆穩獨懸。聞道隨刊神禹績。崎嶇曾未到窮邊。

交河山中夜行

晨征宵未已。側足此山泉。秋過交河盛。星當大磧高。邊程依草木。旅食寄弓刀。萬慮沙場裏。驅車敢告勞。
過烏孫法噶木石盡墨。云雷火所燒。

曉樹深欹壑。秋峯峻入天。尙遺燒却火。莫辨藉山年。霧積梯崖仄。風驚棧石懸。挽車縈九折。歷盡轉悽然。

北風

馬上北風哀。黃雲慘不開。寒摧龍磧斷。聲捲鴈沙來。驛騎衣空寄。嫖姚戰未回。何人吹筆檄。淚盡落鵬臺。

雨雪

際海塞沙平。連峯朔雪驚。三秋龍磧度。萬里雁山營。甲冷朝逾響。笳寒夜不鳴。兼裘猶恐薄。愁殺寄衣情。

逆 遲 晚 望

寒原渺無極。十里帶蒼山。落日雙鵬外。秋風萬馬間。滄洲何暇泛。屬國幾時還。惆悵滄河水。悠悠隔漢關。

海 邊 獨 眺

海色莽無際。馮高望沈寥。九霄迷積氣。萬象變靈潮。神蹟傳分屬。仙期想射蛟。銀臺如可見。烟駕欲相邀。

贈 吳 穉 恭 散 騎 故 恭 順 侯 勳 衛

白頭吳叟何龍鍾。先朝曾直華清宮。十年喪亂無人識。萬里羈孤泣路窮。憶昨西京全盛日。子侯年少承殊澤。門下金鞍慣射生。樓中銀管頻留客。油戟香輪陌上驕。佩刀日護紫宸朝。從獵別分都尉馬。奉車特賜侍中貂。山河舉目須臾異。荆棘淒涼舊東第。仙人已歎海生塵。侯家甯保山如礪。幾度天涯怨負薪。蕭條絕塞詎逢春。夢裏宮雲雕輦路。愁中邊草玉關人。玉關回首傷懷抱。短衣濁酒長潦倒。雀滿門前翟氏悲。羊歸隴上蘇卿老。日暮哀笳四野聞。黃榆秋雪正紛紛。馮高欲縱鄉關目。腸斷南歸雁幾羣。

徑 僻

徑僻人過少。山空鳥度稀。亂沙寒不起。急雪暮頻飛。獨對他鄉酒。猶披昨歲衣。故山揚子外。漂泊未成歸。

曉 雁

泱泱汀洲曙。征鴻帶月飛。霜淒聲自切。風急陣偏稀。顧影愁輕織。翔空惜羽衣。方塘春水綠。與爾共言歸。

趙 宮 舊 姬

一從丹闕火不復奉深宮。細馬經邊雪。修娥怨朔風。玉門何日返。翠輦舊時同。腸斷溫明殿。飄零白露中。

沙林道夜行聞鶴

對月

空外臬禽渡。沙邊倦客行。那知遙夜唳。偏恨獨遊情。影落霜岑遠。聲傳月澗清。憐君霄漢侶。何事入遼城。

北渚望月

暉暉明月迥。遙吐雪山岑。一片嬋娟影。千秋離別心。寒生青桂落。先入絳河沈。惆悵沙場外。蒼然霜露深。

空城中見棲鳥感而成詠

徘徊臨北渚。永夜月華寒。顧兔飛難定。金波瀉欲殘。風微頻泛灩。浪細不成團。惆悵佳人遠。含情只獨看。

寄懷陳子長

落日空城裏。無人鳥獨棲。幸逃纖繳暮。得任別枝啼。命子聲偏急。梳翎影乍低。微軀慚鳳族。不敢向金闈。

寒食大雪

覆帳風連曙。長河雪過春。一年頻臥疾。萬里獨懷人。世事文章賤。交情患難真。茫茫窮塞外。愁記別離辰。

可汗河曉望

寒食邊庭雪。嚴陰鬱未開。遙憐戰場柳。春色幾時來。客淚沾笳吹。鄉心托酒杯。鶯花何處好。萬里夢吳臺。

長河決溱抱孤城。河渚蒼蒼牧馬鳴。旌旆曉迷鴉嶺色。風濤春走雁沙聲。近邊亭障千年蹟。出塞星霜萬

里情。繙戍自關軍國計。敢將筋力怨長征。

曉坐

彌戶寂無侶。淒淒露尙垂。樓空秋氣早。林密曉光遲。蕪沒人三徑。蕭條海一涯。此鄉弓馬地。抱簡日低眉。

同德惟及門人陳昭令遊北山

積黛紛巖岫。招尋興未窮。溪聲連暮急。林色帶烟空。書隔邊烽外。秋生旅望中。自憐淹謫戍。俛仰愧牆東。

卞生過飲吳門人

相見添新鬢。相悲話故鄉。那堪逢晏歲。俱是客殊方。擱酒荒臺月。征衣大漠霜。風波滿眼淚。對爾益增傷。

夜行

驚沙莽莽颺風颺。赤燒連天夜氣遙。雪嶺三更人尙獵。冰河四月凍初消。客同屬國思傳雁。地是陰山學射鵰。忽憶吳趨歌吹地。楊花樓閣玉驄驕。

沙嶺晚歸

寒溪不可涉。驅馬出平沙。半磧餘秋燒。千山只暮笳。驚心烽火急。回首塞垣賒。終歲愁奔命。何勞問海查。

過灰扒廢城

大漠何王國。行人此日來。雄圖一戰盡。廢址百年哀。魚鳥空橫草。麒麟已沒苔。松聲悲舊壘。水氣冷荒臺。伊昔龍庭日。曾傳狼羆開。勢窺東海盛。都繞北關迴。候月瑀弓勁。乘冰鐵騎催。兩雄方齟齬。雜種遂紛猜。

覺比徵祠祭。勳期闢草萊。旌飛沙浩浩。鼓合雪皚皚。大敵全師會。孤城力鬪摧。兵聲殘白草。戰哭聚黃埃。韓近秦先舉。虞亡晉始恢。尙傳京觀在。誰嘆僊蠹灰。阨塞形空設。興衰恨莫裁。依稀營畔柳。惆悵笛中梅。叢棘朝晞露。崩沙晚沸雷。撫塵心倥傯。覽跡思徘徊。地遠何人弔。程遙我馬隤。淒涼懷古意。秋角滿長曠。

庚子至日書懷三十韻

舊國歸難定。他鄉節又遷。歲時仍玉瑄。雲物自冰天。漫喜微陽復。徒傷往慮牽。星行方轉次。灰死欲重然。浪跡龍堆外。回腸鯉對年。重闌時問寢。諸弟日隨肩。宴笑潘輿樂。懽娛萊袖鮮。舉觴南至日。獻襪北堂筵。座擁緹帷燭。歌清玉柱絃。土風遺赤豆。庭誥續青編。節比元正重。家欽祖德傳。趨承猶記憶。門次已顛連。家遠三年別。愁深五夜煎。寸心徐庶亂。百口郗公憐。蕙苴人誰辨。申椒世所捐。含悽望鄉國。攬涕托旌旃。土室難淹久。毳裘失靜便。沙崩空磧斷。雪霽亂峯懸。尋眺非吳苑。生涯且朔邊。驕心黃鵠曲。歸路白狼川。敢道文章悞。翻慚性命全。夏羹愁寄食。作賦憶歸田。西笑何時釋。南枝只夢旋。有懷成十志。無處飽三鱸。舊已哀豺遶。今猶畏鵲拳。物情隨貴賤。吾道任連遭。鍛翻嵇中散。依人王仲宣。日遲元陸景。春隔紫臺煙。客髮將三十。親庭渺八千。感時何限恨。腸斷白華篇。

賦得春風和方邵村作

春風日馳蕩。遠近徧亭臺。傳響鶯先覺。縈空柳漸催。暗隨暄氣度。時逐薄寒來。甯有雄雌異。空勞楚客才。送人之渾齋

沃沮西候遠。君去駐旌旄。千帳凝邊色。孤城壓海濤。雪深車不度。風勁角初高。報盡平安火。誰憐吏士勞。

校獵卽事

錦袖臂鷹輕。分弓出柳營。飛身驕馬足。仰手落鷗聲。鼓合風林動。圍開雪野平。歸來金帳飲。一片畫旗明。

憶舊書情寄陳子長一百韻

絕域黃龍外。長城元菟邊。驂棲仍萬里。離別欲三年。天遠浮雲蔽。山深積雪偏。永懷心莫展。延眺目悽然。坐惜佳人渺。空驚迴路懸。迴腸頻雁帛。弔影只雞田。憶昨淹梁獄。當時盡漢賢。共嗟丞相繫。子長尊人素庵先生與予同在請室。獨訝謗書傳。牘背侵周勃。裝貲枉馬援。逢君何磊落。向我各潺湲。乳贖心長怯。鳴雞志不悛。潔殮梧象側。贈縞竹囚前。黯黯臯陶廟。熒熒貫索躔。一言饒契托。十死共連連。撫事惟悲嘯。忘形且醉眠。非關交易合。直是道能全。命酒青觴並。催詩絳蠟燃。斯人哀木索。俗士笑丹鉛。共詫黃門寺。翻多白雪篇。勢猶居畫地。情礙問高天。賦筆摧鸚鵡。啼痕灑杜鵑。上台終不曜。庶女竟蒙愆。已自寬秦格。還誰辨楚荃。鋤蘭方侘傺。泛梗忽聯翩。雁磧嗟俱竄。驪歌竟我先。先生與予皆論謫塞外。先生先予行廿日。春風都市柳。曉日潞河烟。南浦難追祖。西曹黯獨煎。魂應隨去馬。膽尙畏飢鷄。屢抱羈人憤。何堪別緒牽。棘庭纔判袂。蓬轄倏隨肩。去國崔亭伯。無家王仲宣。幸存餘齒在。敢論舊邱捐。客望迷山雨。征途亂野鷗。風沙橫地合。障塞極雲聯。白日陰遼海。黃塵度薊壩。關春榆莽莽。邊雪草芊芊。平郭無停軌。句驪更扣舷。相迎珠勒遠。予至漕。子長迎予十里。披對赭衣穿。暫喜冰天外。重看玉樹連。含辛談出塞。把臂話辭燕。款

款低烏帽。依依坐馬韉。望衡時晤語。秉燭日周旋。夜席銜金盃。晴原簇玉鞭。劍歌何激楚。酒賦自纏綿。道
屈才還大。情深骨已鐫。久諳行役賤。猶得故人憐。仁祖能貽米。延之屢乞錢。相哀賦窮鳥。獨恨咏鳴蟬。方
偃長棲並。甯知更播遷。倚闌心眷眷。沾軾涕漣漣。笛咽翔鳧曲。琴摧去鶴絃。晚風淒別幌。夜月澹離筵。無
復形將影。徒傷筇與弦。柳長空折贈。蓬轉任翩翾。歧路嗟何及。關山各勉旃。無期知此別。有約憶同妍。桃
館消魂地。才堂送客鄽。良游應已矣。吾道詎終焉。虎口殘魂脫。羊腸覆轍駢。雨昏江氣白。霧宿嶺陰元。經
迴程凡幾。投荒路渺千。烏稽封灌莽。紅鑄遠洄漩。邊人呼水在。草中如淖者。曰紅鑄水。絕壑橫豺虎。荒途
少術阡。難花垂隕短。密樹倚山圓。靡靡連錢騎。軘軘服轄韃。未知窮月窟。竟似墜雷淵。躋險憑穿履。啼飢
想囊篋。混同秋漲急。甌脫暮雲騫。地接扶桑畔。人過槃木巔。銀河橫左界。珠斗直南旋。憔悴腸應斷。崎嶇
病莫痊。百程投所屆。萬轉盡洄沿。稍喜勞筋息。重悲累足胼。罪甯當畀虎。意敢望憐蚘。雜草蕪三徑。誅茅
得一椽。葛公蓬作雷。楚客蕙爲橈。家遠安殊俗。身貧問治佃。浮生原瀆落。舉世自嬋娟。幾乞泉明食。仍殘
子敬鹽。負薪沙渺渺。汲澗溜涓涓。籬缺松枝補。牆欹柳葉纏。故囊無白拾。廢篋有青編。漸覺詩書賤。奚嗟
習俗僂。懷人饒夢寐。就役怯戈鐔。欲命攀嵇駕。難招訪戴船。懸鶉看菹褐。烹鯉讀繒箋。舊好悽心遠。新詩
照眼鮮。瓊瑤思友切。笙鶴禮真虔。子長貽予札云。欲弃謝凡俗。棲心仙道。種草期園客。蒸丹下偃佺。椒庭
應咫尺。烟駕本高褰。緬邈銀臺藥。虛無玉井蓮。鮑焦空憤世。郭璞且遊仙。繫表深遐慕。區中謝廣緣。應知
能却物。誰是未忘筌。螻屈賢人隱。龍馴靜者使。願言乘氣嶠。相見問真詮。跡滯愁難達。情乖忿詎蠲。廬山

春不度。青海凍猶堅。地脈通嗑氣。天心合轉圜。未能期汗漫。聊復卜筵簾。

見離燕

紫燕雙棲好。年年綺戶深。那知金彈懼。相失玉窗陰。覓墨悲新侶。銜泥愴故心。吳宮舊巢處。漂泊豈重尋。

書壁

荷索何來此。沾衣獨念親。最憐今決絕。轉羨昔艱辛。出塞愁中路。趨庭夢裏身。那連明月好。難照倚閨人。

辛丑七夕

拂廬雨過流華月。起視雙星乍明滅。塞外頻驚七夕來。閨中應憶三年別。寂寂深闈白露寒。鴛機遙夜綺羅單。空憐樓閣穿針好。不識關山行路難。

過恭順侯吳公寓齋奉贈

日暮巾車載酒過。青簾烏几共婆娑。年侵漸覺豪游少。官罷方知醉尉多。五國雲山凝旅望。九秋冰雪怨羌歌。那堪回首淮南郡。列帳青油擁玉河。

贈故太常樂工申叟

白首梨園叟。曾聞值御筵。千官丹陛側。百戲翠華前。喪亂悲銅馬。飄零泣綉蟬。那堪關塞外。重對李龜年。

人日過錢子

天畔春生揚子亭。經過小騎憇漂零。曾無綵勝傳人日。虛儼羊裘是客星。遠磧雲陰春漠漠。孤城雪色海

冥冥柏尊相勸還沈飲。遷客由來忌獨醒。

送巴參領

蕭蕭鐵馬嘶。萬里出榆溪。戰氣隨旌旆。邊心入鼓鼙。積荒青海外。驛斷雪山西。上將銘功處。殘碑待爾題。

曷木迤邏曉發

樹杪月猶見。城頭角已殘。荒途分五國。歸騎發三韓。野霧依山盡。春星落塞寒。鳴鞭及前侶。霜露滿孤鞍。

送阿佐領奉使黑斤

槽頭征馬鳴。將軍欲按塞。飛沙咽鼓鞞。長雲擁旌旆。持檄遙頒五國東。揮鞭直歷千山外。千山不盡海東陲。黑水兼天積路迷。金環島戶鷗爲屋。黑斤人耳鼻皆綴以金環。其傍海者。以鷗羽覆屋。石罅種人魚作衣。魚皮爲衣。曲棧荒林紛積阻。剝落殘碑昧今古。冰雪陰崖青鷓風。巖巖亂木黃沙雨。巨鹿岡頭塞北門。千家部落若雲屯。破羌流盡征人血。好進溫貂報國恩。老羌屢侵掠黑斤。非呀哈諸種。寧古歲出大師救之。康熙三年五月大將軍巴公乘大雪襲破之於烏龍江。自是邊患稍息。

許康侯總戎招飲城東江上

一石酒新碧。四月花始紅。陽夏許侯有佳興。攜賓日暮城之東。緹油小幕披華褥。錦袖金鞭照沙曲。烟郭風微晚樹迷。清江冰斷春波綠。雙魚撥刺紅肌鮮。銅壺作餽吹芳烟。客子欲題鸚鵡賦。主人自奏鴛鴦絃。班荆藉草青莎軟。雜坐高歌不知晚。且看懂笑玉山頽。休語風塵銀磧遠。酒盡高麗雙翠罍。看君俊氣何

縱橫半酣忽躍紫駟去。落日南岡按海青。

阿波道中同姚琢之馬上作

長林亘修坂。迢遞抱雲迴。半壩雙流入。千崖一線開。阜鵬驚古木。白豹穴荒臺。去去慚關吏。鳴鞭意轉哀。

曉自沙嶺至馬耳河

海輪先晨聞。城鳥凌旦起。浮客心多懷。侵星戒徂軌。稍稍出烟巒。瀾瀾辨川汜。蘋末風乍颺。蓮房露猶泚。岑翠曳爲霞。林光靄初霽。望遠恒少惊。遊目暫爲美。龍邱徒流歎。雁門未雪騎。良游如可期。結軫從茲始。

七夕陪諸將飲

清夜高城載酒游。輕寒初換紫貂裘。雕弓夾帳空懸月。玉管登臺早入秋。獨向金風嘶戰馬。誰從銀漢問牽牛。年年此夕遐荒外。腸斷穿針故國樓。

贈舊參領穆君

珠勒翩翩白鼻騮。曾提長劍靖邊沙。酬功未見封龍額。突陣還教隸虎牙。羌笛恨餘青海戍。邊烽愁問玉門遮。畫圖今日誰麟閣。十載軍中只鬢華。

送人西行

風野喧征騎。霜笳引別愁。路分稽洛塞。部入骨都侯。駝帳邊陰暮。龍祠海氣秋。蕭條鹽澤外。日夜水西流。

沙嶺作

陟壑憑崖望未窮。塞天城郭暮雲中。征人乘障吹羌管。校尉懸旗下朔風。白雪長寒甌脫裏。青山不到挹婁東。從來閭左多征戍。未敢沾裳怨轉蓬。

同諸公飲城東水次分韻得春字甲寅夏四月二十一日作

數峰空翠照江濱。江水逶迤繞郭新。草色乍消沙塞雪。鶯聲已過故園春。壯心零落還驅馬。絕域驕樓且傍人。漫道物華堪歷覽。清罇相見莫辭頻。

海郎山靈湫神女歌山頂有公主臺遺址

海郎山色倚巉巖。山半靈湫映曉嵐。公主舊臺餘翠岫。神女新祠傍綠潭。神女嬋娟艷瑤彩。霏烟曳月迷年載。怨入青娥憶漢宮。魂依白鶴長遼海。含睇凝情不可親。乘風颯颯如有人。虛無瓊珮空山雨。杳渺鸞騁絕島雲。和親當日悲登隴。遺恨千秋塵預洞。寶鏡何時別紫闈。玉衣無處尋青冢。松花檉葉小祠荒。總帳無人春日長。鴉翅髮垂宮樣髻。虎章腰結羽人妝。香粉長筵醉芳醕。巫女如花下靈語。踏霧時聞石馬嘶。騰波自共冰姨舞。一曲迎神蘆管愁。年年賽火海東頭。望鄉莫更歌黃鶴。紅粉魂歸塞雨秋。

帳中夜坐

虛帳風初霽。長宵露欲侵。銀河垂磧外。珠斗落峯陰。獨下聞笳淚。誰憐擊筑心。南鴻飛漸少。何處寄歸音。

謝子長見懷之作

塞城愁眺塞天分。歲暮懷人渺白雲。路絕紫關長望國。書來青海尙離羣。冰河雁陣霜中斷。雪磧鶉聲夜

半聞回首秋風燕市裏。酒杯何日更同君。
館娃宮外石湖頭。桂槳蘭橈擬並游。豈意風塵淹絕塞。獨將花月憶芳洲。龍山雨雪征人淚。鶴澗笙歌故國愁。何日刀環尋舊約。春江作伴逐沙鷗。

贈人

韞帶雕韉馬上飛。白頭憐爾尙輕肥。勳遺左地新傳箭。恩憶前朝舊賜衣。秋雪金河千帳失。寒雲銀磧十年歸。劍鋒用盡創痍在。愁殺松山夜突圍。

送人從軍

漢法弛刑徒。幽陵挽強客。一朝隸戎行。萬里輕沙磧。身賤功詎論。軍孤戰偏力。曉度旌旆寒。夜嚴刁斗急。刁斗聲中起控弦。混同江水動樓船。十年謫戍頭今白。猶著征衣更出邊。

上巳同錢德維姚琢之飲江上

江頭昨日氛埃霽。禊飲相邀出中泚。風景應嗟非故園。年光仍道逢元巳。我家遙隔吳江濱。細柳崇蘭此日新。金羈小苑流杯客。玉袖高樓吹笛人。可憐徒旅天山下。不見春風吹四野。際海冰河見斷鴻。連山雪帳聞嘶馬。宿昔繁華夢有無。年年乘障挽螿弧。束皙何須矜博物。阮公終日哭窮途。

席上賦得吳郡

踞虎餘神跡。疏龍儼帝州。夫差於西山。疏鑿龍池。九途環綠水。萬戶夾朱樓。花柳先春見。笙歌入夜遊。誰

知張翰意。鱸膾動鄉愁。

宮怨

玉砌霜花薄。金鋪月影多。自從辭輦後。無復翠華過。

七夕

搖落逢佳節。空庭片月流。玉繩低拂樹。銀漢迴涵秋。客淚他鄉酒。驕心故國樓。悽然望牛女。萬里獨含愁。

過琢之齋

小徑帶芳洲。森然水木幽。倚風人獨醉。竟日客能留。江色偏宜晚。林霏欲入秋。滄浪如可去。乘月問扁舟。

九月八日作

三秋行欲暮。萬里坐含思。搖落驚邊塞。羈孤感歲時。淚沾吹笛伎。身逐控弦兒。明發登高處。雲山抵益悲。

九日自木丹山歸過淨公蘭若

千山鳥道出雲層。九日龍沙欲渡冰。征戍未歸榆塞客。經行空對竹林僧。深秋漁獵頻相命。絕域樓臺且共登。知爾浮杯心不著。憐予對酒怨難勝。

九月十六夜之密將訪馮侍御炳文

日暮山深少行客。四野秋風吹瑟瑟。黃雲垂葉暗孤城。白月生寒照空磧。磧裏沙昏野燒微。城頭霜淨戍烟稀。何處風前度哀角。可憐秋盡猶單衣。觸夜驅車還獨往。綠雲石磴嗟峨上。雉雒頻驚暮雪深。馬啼欲

渡秋冰響。冰雪連山黯不開。憐君遙夕思徘徊。征人應是知寒早。常侍誰言帶熱來。

春草園林歌贈友丙午年作

昔逢楚臺客。爲說黔公園。樓臺照海水。花石亘山樊。十年南望紆長想。銅柱天涯未能往。忽漫披圖朔塞前。恍然置我昆池上。澹淡如聞碧澗流。微茫疑入雲林幽。葉榆川色當階暎。越巒山光繞戶稠。歷歷巖巒分咫尺。陰陰亭閣毫間出。千樹烟綿綺榭深。數峯翠入珠窓溼。窗開面面俯垂楊。一片池陰繞畫廊。竹外射堂馳馬埒。花邊步障鬪雞場。鬪雞馳馬紛遊讌。指點繁華歎奔電。漢代升平故老知。侯家富貴當時擅。伊昔黔甯下百蠻。卓犖勳名湯鄧間。分券百年朱鳥社。建牙萬里碧雞山。一自烽烟暗滇海。朱門青闥知何在。鶴歸猶嘆市朝非。燕去甯論臺榭改。雨雪飄搖大漠昏。風塵誰識故王孫。空將吹笛思金谷。幾度聞笳怨玉門。憐君遷謫何時返。獨抱丹青意憤懣。東陵衰賤欲摧眉。南詔雲山如在眼。落日荒臺故國秋。六王茅土竟誰留。莫將鳴鶴園中賞。來作和龍塞外愁。

元旦

龍磧層陰雪未殘。又傳春候度辰韓。旌飛小隊晴雲細。弓倚嚴城曉日寒。自擁羊裘沾客淚。誰傳馬酒試辛盤。東風苦憶吳宮路。苑柳官梅繞玉闌。塞外元日。必嚴列旌旗。城門徧懸弓矢。

贈色君

少將風流雅不羣。安東幕府獨推君。期門舊屬張公子。出塞新從霍冠軍。馬上錦裘青海雪。鵝邊銀鑕黑

山雲翩翩家世通侯貴。不識龍城百戰勳。

祁奕喜初至留飲

清霜羸馬古城東。笳管聲淒帳影空。一別朱門瑤草後。相逢紫塞戰塵中。交游祇訝當時盡。尊酒翻憐此夕同。莫道朔邊冰雪地。遷人何處不途窮。

木參領還自西域賦贈

聞君昨向月支回。絕域關河抵掌開。楊柳自迎征騎發。蒲萄不逐使車來。駘雷塞絕駿猊坂。積雪山迴龍馬臺。千載西陲誇右臂。鑿空誰識漢臣才。

三山道士工馬便射賦此贈之

柘月新弓馬上驕。鳴鞭驚見羽衣飄。曾驂瑤圃仙人鹿。欲按金河都護鵬。白雪征行邊朔苦。紫雲歸路海天遙。何時更逐秦皇使。蓬島樓船試射蛟。

送薩參領

高楊城郭草初曠。翠帶風飄錦戰帟。五月混同獨白雪。單車甌脫只黃雲。射魚都遠人難到。市鹿軍回路自分。今日漠南無戰伐。不須鐵馬更嘶羣。

贈張侍郎坦公次姚琢之韻

憐君遊屐滿高峯。華髮南冠日引筇。幸免濁流沈白馬。何妨遠謫度黃龍。愁來獨倚邊城笛。老去頻思禁

苑鐘雄劍茂先悲尙在。誰將赤土拭芙蓉。公遭國賊之亂。

東錢子方叔

垂楊千萬絲。東風弄烟碧。別君曾幾時。中宵夢顏色。聞君卜築小城南。野性由來七不堪。塔分紅藥過新雨。窗倚青山入曉嵐。寂寥隱几無塵事。細草萋萋滿苦地。絲履能彈劉向棋。練裙自草羊欣字。落日衡門怨索居。洛生新咏近何如。邊庭自昔輕儒雅。嗟爾長貧更讀書。

贈少年

十八海東兒。容華皎白雪。結束紫貂衣。翩翩事遊獵。豪鷹脫綠鞵。生馬嘶紅鬣。躡韃五石弓。金纜兩重甲。秋草山頭獵。火燒合圍飛。騎北風。騷少年獨得嫖姚顧。笑傍金鞍共射鷗。

贈吳興錢虞仲

邊頭七月清霜早。越客思歸怨邊草。歲晏頻傷朔野寒。秋來倍憶前溪好。君家閨閣傍前溪。公子風流白袷衣。銀燭夜屏羸女鳳。瓊鉤秋帳汝南雞。傾城名士俱年少。侍女新聲採菱調。倚瑟偏令紅袖憐。按歌不惜青衣諠。容與深閨樂未央。尊前歌笑鬱金香。共道冶遊羅綺盛。那知離別塞垣長。塞垣回首繁華重。闕下西風供旅病。宛轉環留都尉刀。葳蕤帶結秦嘉鏡。鏡裏徘徊髮欲秋。年年驛使寄衣愁。玉管相思雞鹿塞。錦衾歸夢鳳凰樓。鳳樓雞塞三千里。遼水吳峯詎相似。應憐織素悞佳人。却悔從軍成蕩子。搖落關山慘客顏。故園奇樹更誰攀。遙知玉筯長沾臚。無那金鞍只未還。

早秋陪諸公遊密將山

招邀出郭門。青山殊未已。金鞍小騎何連翩。人影遙遙翠微裏。翠微一望延曾巒。深松伏澗相風湍。飛泉半挂銀河殘。秋嵐散入芙蓉寒。石門黯黯金花裂。隔溪蒼翠時明滅。回風絕壁森晝陰。六月空濛見殘雪。西峯百尺寒崔嵬。振衣欲上觀蓬萊。黃雲泱泱動海色。樓船射蛟安在哉。松花江水流浩浩。千秋戰骨關山道。龍堆狼望空嵯峨。飛將勳名歸蔓草。昨夜秋風吹塞天。臨潢萬樹生寒烟。金笳玉笛起愁思。邊心四據空茫然。安得仙槎泛清淺。乘流直度支機前。壯士無家誰不憐。李陵已向陰沙沒。逢萌空稅遼東田。君不見徽宗埋骨空江曲。遺冢蒼茫走麋鹿。徽宗冢在五國城西。艮岳風流亦一時。黃沙玉柙無人哭。萬乘飄零且復然。吾生那更悲窮谷。擊筑高歌出塞辭。何如楚客吹參差。眼前有酒且不飲。迢遙漫作鄉關思。紫駟嚼嚙當風嘶。爲君重進金屈卮。醉臥青山且莫歸。明朝秋雪吹人衣。

送人

宛馬柘弓鳴。邊沙毳帳輕。秋風玉關外。送客錦城行。錦城花柳何年別。塞草關榆幾回歇。刁斗征人長白雲。長白山在寧古之西。萋萋思婦流黃月。鄉路迢遙劍閣西。君行正值子規啼。跼蔦山瘴閉銅鼓。如馬江濤見石犀。尺書歸報蓮花幕。西南喜見烽烟落。寶人不復閉昆明。漢使猶傳略印笮。盡日軍城檠戟閒。紅椒花發映旌旗。應將漠北羌笳曲。譜入天南蜀國絃。

寄懷陳子長

雪霽山城月色新。天涯憐汝倍沾巾。家殘已恨無歸日。道遠空憐夢故人。尺素三秋憑去雁。短衣十月歎懸鶉。傷心同是他鄉客。偏是相思隔塞塵。

寄懷孫赤崖

已是淹窮微。那堪更索居。中宵頻夢汝。晏歲益愁予。多病憐青鏡。繁憂托素書。天涯知舊少。漂泊意何如。

送人之梭龍

落日嘶征馬。雙旌出塞門。犬牙千障合。虎落萬人屯。力戰原□法。弛刑亦漢恩。雕戈風雪裏。誰念度烏孫。

春夜歸自西郊不寐閱顧華峯舊所寄札

天寒轉玉繩。獨夜旅愁凝。野色延殘雪。春流響斷冰。檢書人獨遠。憶別夢相仍。磨滅三年字。因君欲撫膺。

詠張侍郎齋前小松同錢德惟賦

小松亭亭托幽徑。黛色凝階石苔靜。吐葉纔凌春草高。抽條已入秋霜勁。拂露搖烟影漸濃。寥寥輕吹度。簷風三鬣未垂甯。似馬九鱗欲起乍疑龍。偃蹇孤根矜得地。庭幕玲瓏映新翠。應知弱幹不勝梁。且共卑枝低繞砌。一別林巒幾歲年。寄君欄畔任君憐。何當更植丹崖外。天矯雲霞待偃佺。

送薩參領入都

畫角吹嚴霜。征車待明發。手持都護書。去謁承華闕。奉使偏輕萬里行。辭家又作經時別。磧裏春來草未生。黃雲荒戍度雙旌。行人馬首吹羌笛。客路鴻邊指帝城。帝城此日多權賞。翠蓋驪珂自來往。春燕樓臺

照玉河。曙鴉宮殿輝金掌。如君俊邁許誰倫。入奏應知寵命新。封事倘傳青鎖闥。流離須憶紫闈人。

贈人

瑠服翩翩錦帶鉤。珠袍輕襲紫貂裘。頻彈寶鉞將軍幕。獨倚銀箏少婦樓。磧裏按鵬沙欲暮。埽中調馬草初秋。龍庭亦是豪游地。海月邊霜未覺愁。

瓜兒伽屯值雨晚過村叟家宿卽事書寄孫赤崖陳子長五十韻

我行龍水外。雨過雁山陽。曠野無人渡。會陰極目長。橫天風瑟瑟。匝地霧蒼蒼。聲捲燕沙黑。烟沈遠樹黃。溪流侵磴瀉。嵐色鎖村荒。渺漫彌寒望。悽其斷客腸。熟梅思故國。泛梗怨他鄉。塞柳沾全重。山花溼罷芳。寒鷗迷灌木。牧馬失遙岡。膠漬難調箭。氈濡欲壓房。危坡愁徙帳。仄徑怯攜囊。虎跡平林畔。牛聲草舍旁。渡河兒跋馬。繞隰婦驅羊。殘竈收空壑。斜暉下短牆。逢人惟戍客。問土是嚴疆。瓦缶參爲餌。蘆罌酪作漿。留賓登土鏗。延叟坐繩牀。藜切青絲菜。盤行赤穎梁。未秋聞割蜜。入夜見然糠。杯裏弓懸影。燈前劍吐芒。山川應異漢。兵甲尙傳唐。惻惻江南客。蕭蕭塞北裝。身方隨拜柳。心漫結垂楊。牢落知誰恤。羈孤敢自傷。莫吟青玉案。且任紫絲轡。謫遠虞翻柱。途窮阮籍狂。恨爲雞寨別。悔未鹿門藏。世欲鋤蘭畹。人徒佩蕙纒。斷紅悲少婦。垂白想高堂。夢繞三年月。愁新兩鬢霜。田園盡蕪沒。門第半傾亡。臣罪何當惜。天心詎可量。微生混牛驥。殘息傍豺狼。坎壤原吾黨。飄零亦士常。旅懷憂但但。離緒涕浪浪。消息遙江介。關山隔帶方。生涯應已矣。故舊耿難忘。共鬱青霞意。難希白日光。軍中滯孫楚。隴外竄陳湯。述憤歌慷慨。貽詩興激昂。

風流君未墜。險阻我偏嘗。空闊千年積。蒼茫百戰場。有哀傳玉笛。無處訴金觴。已自竅鷓鴣。休矜蠟鳳凰。曲成惟出塞。賦就異浮湘。宿昔曾投漆。招尋會裹糧。冷山風慘切。瀚海月淒涼。望望人何在。悠悠路未央。側身看朔漠。回首怨河梁。欲問離居意。天涯泣數行。

宿混同江明日立秋

孤帳長川畔。荒城大漠東。邊心淹夜月。客淚入秋風。磧冷鵬盤急。沙鳴雁宿空。明朝腸斷處。一葉故園桐。

秋山觀姬人採花

照野秋芳晚。攜筐盧女行。條縈纖手艷。花冒靚妝明。浥露沾衣重。因風委地輕。飄零邊候裏。採掇若爲情。

送友人

日落單車發。沙平迴路分。一尊頻送客。孤劍獨從軍。大野生秋氣。荒臺足暮雲。最憐俱絕塞。猶自泣離羣。

重陽夜送人西行

甫罷登高會。明星又別筵。憐予黃菊酒。送汝白狼川。永夜低銀燭。嚴秋勁玉鞭。征途殊未極。應恨去經年。

九月十日雨雪達暮寄琢之

短轅昨向西山別。一夕邊風動嚴節。戲馬纔傳九日臺。和龍已度千峯雪。千峯雪色正漂零。惆悵登高故國情。颯颯蒸沙驚大漠。蒼蒼苦霧失孤城。城角聲沈更漏永。開軒半霽星河影。朔氣偏生玉帳寒。清光直照銀戈冷。乘輿期君匹馬過。霏霏秋雪奈愁何。憐將昨日紅萸酒。淚盡今宵黃竹歌。

秋笳集卷三

詩二

冰井曲

朔風吹合圓泉水。六尺曾冰凍清泚。皎潔偏臨璧甃明。岩亭已映銀牀起。皜皜銀牀影欲重。流霜鑒月共玲瓏。光凝雲母深含景。冷結琉璃半累空。可憐少婦爭朝汲。錦靴顧步愁無力。乍照青蛾玉鏡寒。欲憑素手品闌溼。日日攜羣幽怨多。嚴陰不散碧差峩。轆轤宛轉霜絲綆。泣向寒泉奈若何。

讀張司空所撰岱史奉贈

司空雅博物。愛撰名山志。冷然塵外鑣。自灑壺中字。採秀曾聞到石閭。抽毫已似窺金記。此日羈棲咏四愁。側身梁父憶前游。蒼茫日觀羣峯表。海色天雞瞰十洲。

送哈佐領之朝鮮

帽側溫貂繡袷紅。蹙金韞帶兩駢弓。平明車騎凌江發。大雪旌旗度漠空。葦嶺天分邊草外。熊津地隔海潮東。知君談笑遐荒靜。百戰甯誇荀彧功。

曉登東嶺寄楊友聲次姚琢之韻

雙峯霜淨削觚稜。倚馬高寒試一登。曉色迴添鷓嶺雪。春風不拆菟河冰。名汗久擬淪屠釣。身廢空憐有愛憎。鄉國茫茫徒極目。圖南誰道是鯤鵬。

早春集錢虞仲齋

晴雪層巒炤簾牖。文茵雜坐淹杯酒。徑荒空見沒蓬蒿。春至何曾識花柳。四座高談殊未休。徘徊片月挂城頭。醉憑服匿悲歌發。忽憶西園舊日遊。

馬耳山中同姚琢之作

薄暮巖林外。飛花滿綠蕪。已從青海戍。空對白雲孤。身世歸鞍馬。山河逸酒壚。尙餘臨眺興。未可慟窮途。

聽高小乾話秦淮舊事作

秦淮昔全盛。萬戶起江湖。燈火眞珠舫。樓臺碧玉簫。黃塵愁北徙。白首話南朝。歷歷升平事。天涯夢已遙。

代姬人寄贈錢茂才方叔

妾家高樓臨狹斜。夾道金椎楊柳花。銀鋪曉日流蘇帳。綺陌春風油壁車。春風搖裔春光徧。征夫一去愁相見。裊裊遙憐邊地桑。飛飛獨對文梁燕。孔雀流鶯曉夕聞。綠錢生砌青氛氳。塵鏡金繩四龍網。空牀珠被雙鳳紋。離房寂寞長多暇。綺瑟瑤箏空夜夜。寶鬢繚紹罷新梳。翠眉連娟弛故畫。昨逢邊使自遼東。聞君萬里尙從戎。刁斗三年出元菟。樓船百戰度烏龍。烏龍絕漠征行久。離思徒悲笛中柳。紫壘秋寒君自知。青漆春樓妾空守。妾恨綿綿思斷腸。君行迢遞滯瓊鄉。空覓生香寄韓掾。空持團扇憶王郎。惆悵容華

正三五年年紅粉坐啼妝。

送巴公子之京

識君幾載安東幕。虎竹家聲擅沙朔。朝逐黃頭出射堂。暮攜紅袖還鈴閣。塞上風光白雪霏。玉花小馬繡障泥。金盤屢進黃羊炙。錦帶雙飛青鼠衣。父任爲郎正年少。雅工漢語羣推妙。承恩擬謁蘭臺宮。攬轡初辭柳河徼。公子乘春上苑遊。如雲祖帳擁鳴騶。鳳城三月楊花滿。踐躒金羈過御溝。

送錢丹季之松花兀喇

男兒好長征。結束事軍僑。鳴鞭欲何適。松花江路遙。山雪北橫漠。河冰西限遼。曉色帶歸雁。夜火驚鳴鷗。千峯萬嶺迷南北。送爾行行一沾臆。馬上驚蓬無那飛。笛中折柳長相憶。

少年行丁未年作

少年便弓馬。落魄無所憂。自矜紫臺客。愛作朱門遊。曾陪北部大都尉。新事西京博陸侯。三月春風滿京國。待詔期門執長戟。銅駝街畔臂鷹歸。金馬門前賜衣出。天書趣拜羽林郎。腰間鏤帶黃金璫。鸚鵡杯傳仙液暖。鷓鴣冠插翠綵長。歸來塞外驅駟馬。賓御如雲曜原野。落鵬都護揖車前。射雉參軍候鈴下。驕奢直擬徹侯家。貧賤甯憐舊遊者。海東健兒浴鐵衣。沙場幾度決重圍。有功不解謁權貴。戰如熊虎誰知之。

山中晚行至阿波屯宿

不盡烟巒裏。驅車日暮回。一溪紆嶺戍。十里及烽臺。獵火雲中出。征途樹杪來。甯知豺虎窟。稅駕欲徘徊。

張坦公侍郎齋中觀白蓮歌

高堂日暮收微雨。坐對蓮潭不知暑。簾櫳窈窕吹芳菲。召客看花酒如乳。玉壺綺饌當軒開。捲幔荷風面
面來。花枝入座香欲動。皎如月出臨瑤臺。庭影離離媚將夕。池光汎汎凝珍席。素裳欲逐鮮魑輕。粉態愁
侵晚雲溼。起坐高歌按採蓮。笛聲寥亮驚四筵。惆悵邊寒易零落。容華傾國誰相憐。我家池館臨江甸。灼
灼芙蕖照人面。羅袖風微蘭棹輕。金塘玉淑長相見。自從漂泊龍庭前。斗柄秋風幾回變。漾楫頻思淶水
洲。聞歌尙憶朱樓燕。舊國風流怨錦帆。殊方星歲悲銀箭。持觴酌我我豈遠。彈弦拂柱酣馳暉。碧雲遙遙
月初上。醉倚金鞍忘却歸。還憐公等京華去。此地看花更有誰。

早秋同錢子

客遊心易悲。巖棲秋早冽。與子涉蕭辰。含悽眺寥泬。寒波警洲渚。空翠收岑榭。盈盈散渚鴻。槭槭下林葉。
胡然淒序臨。坐令韶景歇。金膏空爾懷。瑤華詎堪折。履霜方自今。何以肆愉悅。

秋夕同諸君飲張司空灑嵐閣

淒淒素商邁。悠悠清夜遲。眷言命賓友。攀閣相招攜。微雲斂綺霄。陰籟虛丹厓。霧花烟稍積。沾條露始滋。
銀河耿遙景。金波淪素姿。馮軒獨緬邈。叩盤空悽漈。邊候旣已寒。秋華甯久輝。且盡綠樽樂。詎知元朔悲。
儻宴未可常。憂襟何由辭。

寄王總戎

出戍君何恨。新妝有莫愁。金鞍衝塞曉。玉袖度關秋。百戰餘紅粉。孤征已白頭。瓊牖風雪裏。應按小伊州。
送人之羌突里街

颯沓黃驄去。秋風動玉珂。蒼茫元菟外。落日滿金河。故壘鳴笳少。晴原徒帳多。年年候烽火。愁唱破羌歌。
送友人還兀喇

輓轅余纔返。嚴車爾復回。愁將征戍淚。重對別離杯。山勢侵長塞。河聲咽舊臺。北風哀角裏。獨過白龍堆。
阿波山中訪張子

石門樓隱處。遙在白雲隈。一徑穿巖入。孤村倚澗開。秋嵐生薜荔。陰雪洒莓苔。爲問揚雄宅。何人載酒來。
自密將夜歸登舊寧古臺

清霜十里度烟樹。月迥荒臺立馬看。紫塞清秋增曠莽。絳河遙夜動波瀾。心隨候雁鄉關遠。淚入征笳道路難。肌力自憐乘障久。無衣不復訝邊寒。

黑林

黑林天險削難平。唐將會傳此駐兵。形勝萬年雄北極。勳名異代想東征。廢營秋鬱風雲氣。大磧宵聞劍戟聲。歷歷山川攻戰地。只今旌甲偃邊城。

郊行贈雁羣

城北城南千樹林。斷烟衰草日蕭森。白山冰雪秋將暮。黑水風雲晝欲陰。龍笛三年吹客淚。鴛機萬里寄

邊心招邀漫極江皋目。憔悴終傷澤畔吟。

夜飲色侍中宅卽事成咏

列伎褰華幕。留賓啓畫堂。共彈盧女曲。莫厭次公狂。倚扇青蛾好。行杯翠袖長。今宵銀燭底。不信是沙場。

奉送大將軍按部海東

玉勒動珠幘。旌旗遠肅紛。鳴弓行磧雪。飛蓋入邊雲。屬國鮫魚部。佳兵鵝鶴羣。海東三萬里。笳吹日相聞。

寄錢子方叔

蘋萍植洪濤。從風自糾結。之子在遐陬。驅車日登涉。君行若崇朝。織阿已三闕。托身非故鄉。敢憚長乖別。盛秋霜朔寒。嚴飈素肌裂。山高不可凌。况乃無裘褐。平沙遶無津。曾冰慘難輟。未知歸國期。且復履邊雪。盛年委榛莽。壯氣盡羈綫。一奏式微篇。空令心斷絕。

張侍郎齋觀山水畫卷歌

張公靜者流。蕭然寡塵慮。昨出名山圖。知愛滄洲趣。粲粲紈素色。歷歷烟霞峯。彷彿草堂上。坐對松巖風。樛枝龍嵒倚。山閣似有樵聲出。雲壑瑤草萋萋暖欲生。石華濛濛寒不落。澗邊接飲垂清猿。林上將雛引雙鶴。聞君昔憩嵩邱山。紫翠巖庭縹緲閒。手倚鳳笙坐磐石。雙雙玉女芙蓉鬢。竭來塵世空茫然。矯首仙城不可攀。却顧丹青意愉悅。十載關山倦輪鞅。回崖疑入天壇松。懸瀑如聞石淙響。滿眼林泉故國遊。憐君邱壑舊風流。鄭虔漫自矜三絕。張載惟應擬四愁。

卽事

龍沙飛雪中夜驚。微巡刁斗寒無聲。少年盜符出鈴下。關門未曉雞爭鳴。追騎如雲促嚴鼓。烽堠連天斷行旅。此去甯逢漁丈人。閒行且逐奴甘父。匹馬邊程白草枯。崎嶇何日達飛狐。應知天地容亡命。擊筑還過舊酒壚。

上已許康侯招同諸君禊飲江上卽席分韻得年字

近郭林巒淨野烟。佳辰車騎徧晴川。秉蘭禊事仍三日。拜柳軍僑已十年。寒雪漸消貂去後。春風不在雁歸前。流澌處處滄江裏。欲泛清觴倍惘然。塞外以紹入深山爲雪消之候。

阿波山中呈安都統

暮雲巖徑遞崕峩。初柳山橋送客過。未見風沙開玉帳。漸看冰雪霽金河。春深絕徼歸鴻少。目下荒原牧馬多。欲逐車塵誇羽獵。書生無那怯雕戈。

渡混同江

江濤滾滾白山來。倚櫂中流極望哀。襟帶黃龍穿磧下。劃分元菟蹴關回。部餘石砦雄風在。地是金源霸業開。欲讀殘碑詢故老。銘功無字蝕蒼苔。

送人之粵東辛丑年作

高楊葉未齊。芳草色初碧。春風搖玉鞭。誰是南歸客。送君南去古交州。湏水遙連瀧水流。珠出雞湖長不

夜。花明。鶯瘴未會秋。征南將吏銅牙弩。君到玉門見歌舞。賜棗應知勳越王。賦詩且復參蠻府。蠻府迢迢五管分。風流爭識沈休文。五羊城畔如相憶。好折檣榔寄朔雲。

咏隣姬

家臨苧蘿畔。生小艷蛾眉。嫁與沙場客。飄零逐馬蹄。金鈿空自好。玉筯只長垂。宛轉盤龍鏡。春來不忍窺。

曉行

五國城邊月已微。五國城中烏未啼。野昏溪水荒霧積。天寒磧露明星稀。收馬前林踏霜徧。手結征衣赤鞅。鞞。洞底斧冰響。伏貂沙中捲幕驚。鳴雁。蹊蹊孤鞍拂曙行。天涯何日盡邊程。長城回望三千里。一曲哀歌白髮生。

與桐柏山人

山人十年滯廬谷。潦倒黃冠日行哭。飛鶴徒憐托令威。射魚竟未從徐福。回首雲霞空舊山。蕭條邊戍幾時還。共嗟元朔冰霜苦。那得丹砂更駐顏。

奉送巴大將軍東征邏察邏察一名老羌烏孫種也。

烏孫種人侵盜邊。臨潢通夜驚烽烟。安東都護按劍怒。麾兵直度龍庭前。牙前大校五當戶。吏士星陳列嚴鼓。軍聲欲掃昆彌兵。戰氣遙開野人部。捲蘆葉脆吹長歌。雕韃弓矢聲相摩。萬騎晨騰響朱戟。千帳夜移喧紫駝。駝帳連延亘東極。海氣冥濛際天白。龍江水黑雲半昏。馬嶺雪黃暑猶積。凍解沙飛。山雪皆作

黃色蒼茫大磧旌旗行屬國壺漿夾馬迎料知寇兵鳥獸散何須轉鬪摧連營

秋夜師次松花江大將軍以牙兵先濟竊於道旁寓目卽成口號示同觀諸子

落日千旗大野平回濤百丈櫂歌輕江深不動鼉鼉窟塞迴先馳驃騎營
火照鐵衣分萬幕霜寒金柝徧孤城斷流明發諸軍度龍水滔滔看洗兵

城東書感

烟際出雙旌霜崖滑未平邊寒生遠障海氣隱孤城插羽方催粟傳烽未罷兵
白頭沙塞客流涕問東征

曉望

孤角荒臺上寒旌獨戍間雁聲秋滿磧馬色曉彌山霜雨淹時暮兵戈滯客還
淒涼天畔眼誰是玉門關

送人歸遼東

送爾驅征馬離亭葉已飛雲山三歲別風雨一人歸磧晚黃羊少關塞白雁稀
蒼茫望遼海今日是王畿

寄友人

遙憶離陵戍西連吐谷渾三秋兵未解百戰爾猶存關塞分珠斗山河斷鐵門
北方如可托且莫賦招魂

九月八日病起有懷宋旣庭計甫草因憶亡友侯研德宋疇三丁繡夫

歲晚霜清木葉愁病餘蓬徑愧淹留紫臺一別悲蘇李青草頻年哭應劉
歸夢關河長伏枕客心天地各驚秋明朝誰是登高侶零落黃壚豈再遊

九日

龍沙不見戍歸期。抱病頻驚節序移。白草征人千里恨。黃花故國十年思。雪晴大野鵬飛迴。冰薄長河馬度遲。欲上荒臺愁極目。雲山面面是天涯。

奉寄陳相國素庵先生即用先生見寄原韻

昔歲從公別薊門。短衣涕泪日雙痕。誰憐阮籍居窮路。獨向平津感舊恩。空磧冰橫秋未晏。亂山沙起晝長昏。側身西望臨屯塞。滿目寒雲斷客魂。

送使者之蒙古

蹀躞青驪映紫駝。飛揚丹旆擁雕戈。離筵日暮簫笳發。絕塞年來戰伐多。天盡龜林通鐵勒。地從魚海入銀河。旂裘萬里歸持節。定遠勳名未爾過。

與劉子良閱廣輿記因爲予話隴外地形賦此

九邊險絕稱秦隴。抵掌輿圖此問君。天轉黃河深坼地。雪晴紫塞鬱參雲。千年形勝三城繞。一線關山六郡分。表裏莫談疆漢日。蕭條泣盡故將軍。

奉送安都統安集海東諸部因便道閱松花江水軍

雉尾高牙落日懸。雕韃精騎北風前。軍容直歷無雷地。戰氣初消盛雪天。款塞紫貂新屬國。浮江赤馬舊樓船。遙知綏帶行邊處。千帳鏡歌擁玉鞭。

陪張侍郎坦公游西嶺

碧雲日暮春縹緲。林壑峩峩照春好。晴靄遙分雁嶺沙。風光欲綠龍山草。草色萋迷四野開。笑攜筇屐共登臺。烟霽碧潭芳樹暖。天清丹嶂夕嵐來。夕嵐彩翠紛瑤席。岸幘行杯醉佳客。北海何須怨子卿。東山且自陪安石。酒罷還傳洗玉觴。犢車歸路晚蒼蒼。欲將折柳羌人笛。吹入春風憶故鄉。

贈孔叟

孔叟俠者今白頭。橫戈會事當陽侯。崇禎中叟以副帥事楊相國嗣昌。十年困頓蠟螭塞。五月不脫羔羊裘。征南幕府久零落。猶復雄名動寥廓。絕域魂銷白雁書。沙場力盡斑絲槊。擊衣不得心自哀。置鉛無成目空墮。甲申冬欲刺李自成不克。可憐喪亂識鳧毛。敢道精誠生馬角。萬里蒼茫故國悲。側身天地何時歸。鄉夢已迷三楚道。蠻烟休望九疑祠。此日相逢把君手。倚仗荆撫西缶。感舊應憐鬢上霜。悲歌且酌尊中酒。入關蕭永正漂零。思趙廉公已衰朽。半酣起舞何慨慷。俯眉斂跡空摧藏。丈夫失意會如此。君今那必哀窮荒。

遊西山蘭若二十韻

四禪分浩劫。雙樹啓香津。地湧龍沙古。宮開鹿苑新。寶鈴流塞雨。金刹照邊春。窈窕丹爐合。峻嶒碧嶂隣。下堂鐘送客。歸院樹迎人。仙梵消兵氣。天花灑戰塵。瀑泉喧月曉。山磬靜霜晨。咒食聞禽下。繡經見虎馴。果肥風破甲。松勁雪生鱗。座擬逢師子。林應集雁臣。南宗壇卓錫。西竺字函銀。香散冰天畔。僧歸沙海濱。

嘯聲疑藥老。碑製想王巾。共道城爲化。誰憐里是貧。白毫徒彷彿。卓帽自逡巡。已昧生還日。空悲老去身。神人甯夢漢。逐客未歸秦。涕泪瞻慈像。皈依請梵輪。秣林誰抖擻。朔野此沈淪。何日吳中寺。長齋禮應真。

送米參領

詔書昨下麒麟殿。敕勒將軍夜乘傳。五校初歸左地兵。單車欲罷前庭戰。送君萬里向樓蘭。赭汗生駒七寶鞍。腰帶辟邪金錯麗。耳衣舍利錦縫寒。青冥亭障千回轉。白草川原日將晚。磧裏吹笳烟火稀。雪中移帳關山遠。西望蒼茫使節過。野營求水任明駝。界標鵬嶺餘殘壘。路極龍沙見湫河。河塞遙遙逢候吏。百年甌脫誰爭地。乍道軍回遮玉門。須傳使者撓金七。瀚海蕭條正北流。凌稽山畔朔雲秋。遙知錦帳安西部。馬首爭迎博望侯。

寺樓曉望有懷

高樓簾幙俯江瀾。□□□□□□□。鴉色半天凝磧曉。雁聲七月動邊寒。綠尊無處尋文舉。卓帽何人識幼安。消息中原頻斷絕。幾逢歸騎問桑乾。

聞溪聲有感

何處溪流瀉潺潺。聽未窮。數聲秋雨外。一道夕嵐中。甯復逢漁父。空憐作塞翁。扁舟何日去。腸斷五湖東。

送姚琢之赴兀喇

雪花昨夜度秋峯。君去單車積幾重。八月邊程依白雁。千年戰地出黃龍。征衣卒歲何曾授。旅食因人豈

盡供幕府只今勤遠戍。敢將離思問重逢。

同友人夜飲作歌贈之

江色深修夜。雁聲斷清秋。相攜飲沙瀨。渺若凌滄洲。羯鼓逢逢動孤戍。懸火連延儼華炬。泠泠玉露搖寒烟。奕奕銀河挂遙樹。夜氣莽蕭森。徘徊霜溼襟。哀絃激西氣。促柱淒南音。南音一曲肝腸絕。憐君向隅淚承睫。蒙段鄉園隔瘴雲。混同邊路驚秋雪。賣瓜誰恤故侯貧。升輦猶悲侍中血。當年出入驅隼旗。可憐今日行無車。一馬之田日蕪穢。數尺荒江身自漁。漁釣優悠且相樂。擊筑吹簫亦不惡。投荒聊復侶豺狼。有道由來在葵菴。一作任龍夔。陳情感舊酒頻傾。撫節高歌月將落。君不見五侯子弟半鉗奴。負薪乞食嗟何如。

八月十五夜望月作

大漠怨涼秋。征人悲暮節。日夕荒城思不怡。却攬羊裘步林樾。遙野寒雕驚古戍。啼鳥歇。如何遠謫心。獨遡清宵月。月出雁山中。徘徊遠近同。享亭初濯魄。鵲竊欲盈空。戰場極目天垂白。蒼茫亭障凝邊色。影入鷹關路。幾重光連龍磧。沙無極。候騎營空刁斗寒。明駝帳冷旌旗溼。一望旌旗亘朔邊。幾回離別恨纏綿。金波不夜空千里。玉塞傷秋又一年。秋塞沈沈歲將暮。盈虧屢向愁中度。明鏡蟾蜍只自飛。大刀龍雀徒相誤。謾道邊心托鼓笳。可憐客思淹霜露。盈盈應照去年人。望望還迷舊鄉路。舊鄉迢遞海雲端。朱門此夜正尋歡。纖手雕觴進浮蟻。小腰綺帶引驚鸞。銀閣烟花秋未素。玉屏歌吹夜將闌。玉屏銀閣關山隔。望

遠懷鄉淚頻積。良讎空教感舊時。清光祗自憐今夕。今夕天涯意轉悲。拂廬落月靄深輝。登高欲作劉琨嘯。裂帛誰將蘇武歸。

登樓

八月霜風早。寒笳睥睨愁。長雲橫塞晚。落日澹邊秋。意氣誰橫槊。蕭條只倚樓。空餘滄海思。十載滯韓州。九日登東山。憶甲辰此日。同馮炳文侍御遊眺河上。錢虞仲茂才以五言長律相贈。今馮錢皆逝。溯懷疇昔情見乎辭。

蒼茫巖徑抱烟稠。落日攀登動昔愁。雁塞雲山低薄暮。龍沙冰雪亂清秋。銜杯彭澤仍佳節。吹笛山陽已舊遊。三載夜臺人不見。空將沈醉哭西州。

野宿

獵罷班聲夜磧空。千燈星亂擁元戎。金笳不動關山月。鐵騎長寒海戍風。自是嫖姚雄塞外。空慙孫楚在軍中。十年書劍長征慣。悵望深宵更倚弓。

寺樓雨望懷楊友聲

北風吹雨色。日暮徧江潯。木葉千山冷。松陰百里深。樓臺紛遠目。砧杵動離心。遙憶求羊徑。蕭條孰爾尋。

贈高生

高生家本宛溪涘。當年曾許工文史。五年漂泊塞垣秋。夢斷江關八千里。一戍天涯恨不歸。邊霜蕭颯摧

人肌金戈夜雪哀吹角。錦石秋風憶擣衣。落魄行歌空太息。養雞牧豕無顏色。貨舂廡下不見收。斫屨山前詎能識。昨日逢君大道旁。頭須欲白神昂藏。藜羹不糝雜泥滓。短衣無緒蒙雪霜。豈無高門與大第。齷齪何曾稱人意。乞食難逢女子憐。望塵易盡詞人氣。日暮荒郊行負薪。歸來黔突欲生塵。憐君更灑楊朱淚。予亦龍荒放逐人。

山行有懷舊遊諸子

冰雪峻嶒帶遠川。北風驅馬夕陽邊。山晴曠望黃羊磧。歲暮崢嶸白雁天。少壯已過多難日。風流空憶昔遊年。悲歌不盡鄉關思。泣向沙場倍黯然。

晚自雞嶺崖至天龍屯

迢遞回岡抱塞長。暮雲歸路劇羊腸。馬嘶古磧寒沙白。鴉亂荒城落照黃。病後關河空涕淚。戰餘身世各蒼茫。客游不異松花水。日夜滔滔下北荒。

寒食日作

昨歲從軍粟末城。今年寒食尙行營。干戈祗益他鄉淚。時序偏傷故國情。雪霽寒沙堪射兔。天寒邊柳不聞鶯。年華已分沙場老。敢向春風恨遠征。

芳樹

春樹試春風。飛花澹蕩紅。縈烟垂砌外。揚彩入樓中。葉暗鶯啼徧。枝高月度空。有情憐蕩子。流涕向芳叢。

巫山高

白帝通巫峽。黃牛對楚臺。陽雲當日夢。暮雨至今來。樹色連冬落。猿聲接曉哀。高邱遺廟在。想像珮環回。

銅雀伎

愁殺望陵人。年年漳水濱。月沈銀海雁。春斷玉衣塵。理曲縈紅態。凝妝掩翠顰。殷勤羅綺意。猶是昔橫陳。

中山孺子妾

妖姬容易寵。得奉玉階深。荷妾鳴環麗。當君倚瑟心。腰纖嗟北里。鬢巧飾南金。持謝宮中伴。辛勤抱錦衾。

結客少年場

家世扶風里。英聲擅帝州。結交憑喜怒。馳俠辨恩仇。夜火藍田獵。春鑣素滻遊。橫刀千里去。羞屬富平侯。

湘妃怨

蒼梧渺何許。迢遞隔湘岑。帝子無還日。江流空至今。亂猿傳晚嘯。叢竹暖春陰。何限懷君意。慄其瑤瑟音。

長門怨

君王憐鬢髮。棄妾在長門。自謝平陽舞。難邀複道恩。塗黃思故愛。破粉怨新痕。寂寂流蘇帳。層楹又向春。

妾薄命

春色掖庭幽。飛花落御溝。可憐蟬鬢色。長作翠蛾愁。妾夢依塘上。君恩隔殿頭。下陳曾未及。誰信善箴篋。

將進酒

絃管鬱金堂。烏棲夜有霜。玉羈邀上客。羅袖出名倡。漏促銀虬咽。尊浮綠蟻芳。明朝歌舞處。又擬向平陽。

採蓮曲

倚楫綠潭空。新蓮相映紅。折莖愁刺密。攬葯愛心同。錦纜明斜日。羅衣逐晚風。船回繁吹合。爭入館娃宮。

春曲

樹色迎韶月。風光徧晚春。柳迷調馬客。花醉鬪雞人。被水羅裙艷。縈山錦帳新。年年行樂處。長在小平津。

閨怨

樓外露初溥。紅閨夜欲闌。風微銀漏徹。月迴玉繩殘。翠袂浮香薄。羅衾裊淚單。空將擣衣恨。迢遞夢皋蘭。

與定之飲

憶汝城南別。邊頭兵正躔。那知烽火後。還共酒杯前。半嶺依殘照。孤城隔暮烟。但令長嘯傲。敢恨滯歸年。

早秋姬人有悲落桐者感而賦此

井梧妝閣畔。秋至欲披離。玉袖徒相惜。金飈只自吹。就衰悲晚葉。抽景憶春枝。縱抱咸池曲。凋零豈見知。

贈張繡虎

昨年聞汝繫京華。忽漫邊頭度玉騮。昔去白衣悲擊筑。今來紅袖泣吹笳。斷腸水咽三秋戍。絕脈城遙萬里沙。誰道飄零非壯士。姓名久已屬輕車。

同陳昭令遊西山道院

新起琳宮俯北岑。秋嵐天半靄沈沈。疎松日冷瑤壇靜。清磬風微碧殿深。爲客久慚元鬢影。懷仙空寄白雲心。可憐百戰龍沙地。猶得相將物外尋。

寄琢之

騁驪鐵馬戰初還。又見征車度遠山。萬事總傷邊塞外。十年空老別離間。秋風穹帳松花戍。夜雪雕戈木葉關。一別天涯嗟歲晚。回腸幾度大刀環。

山夜觀打魚

東峯暮雲裏。巖壑紛坡陀。連山見野火。隔浦聞漁歌。榆溪秋半綠冰合。石梁夜深蘓鯉多。巖下鮫宮百餘尺。椎冰張網那可得。嫋嫋秋風吹早寒。羊裘倚釣空愁立。

奉送副都統安公之烏龍江

安東亞將黃驄馬。夜發旌旗宿烽下。金笳吹雪起行人。銀鑄搖星照秋野。遙遙風旆捲平沙。磧路陰沈極望除。百轉青林幡粟末。雙流黑水接松花。寒原獵火懸軍度。校尉行營在何處。倚月弓開雁陣高。連雲帳繞鷗聲暮。黑狐川畔驛亭開。射鹿崖前候騎來。此去關山秋草徧。行邊何日玉鞍迴。

與張繡虎飲

十載一相見。憐君氣未除。天涯今夕會。舊國隔年書。白髮邊愁裏。青山戰哭餘。不須悲異域。能醉卽吾廬。

王定之過

寥落穹廬外。憐君日暮過。雪聲空磧盛。沙氣廢營多。戍久愁橫劍。兵疲憶偃戈。十年關塞淚。南望意如何。

置酒歌

臨潢城頭暮吹笛。北斗闌干月將出。金吾置酒坐北堂。銀鞍召客何輝煌。織成罽幘芙蓉捲。紫氍新茵獸文軟。黃羊作饌堆金盤。青驪搗酒揮犀椀。筵前火照明星稀。凝笳急管紛相依。錦衣如霧聲絳繡。寶刀拂露光霏微。須臾月東吐。留賓坐搗鼓。還褰丹綺帷。更出紅妝女。金鈿曜紫貂。珠桂襲青鼠。的礫芳昏歌。使娟細腰舞。沈沈芳夜闌。惻惻北風彈。青蛾扇底蹙。素指絃上寒。哀絃聲屢闕。靈虬水頻咽。但顧羅袖歡。詎惜珠纓絕。酒闌華幕坐欲移。徘徊落月秋河低。錦鐙車馬縱橫去。應照香塵繞路飛。

登西閣

高閣秋風蚤。馮軒曉色分。半空長白雪。極目大荒雲。久戍應沈命。孤征敢念羣。還憐豪氣在。長嘯學從軍。
長白山在寧古之西。高二百餘里。夏有積雪。子時風鎖紅旗。

送友人

天涯方戰伐。爾去欲何歸。斜日傳離酌。初寒到客衣。雲從雕外落。霜逐雁前飛。惆悵衰楊色。行人折已稀。

霜後一日。雁卽南飛。

九日同德維雁羣兩同年西山登高

落日一尊酒。長雲萬仞臺。寒聲隨雁去。秋色傍鵬來。烽火鄉書隔。冰霜旅鬢催。故園叢菊在。零落爲誰開。

九月十二晚觀回獵賦贈薩君

山晚初回獵。江寒早渡冰。風旗收萬馬。雪帳散千燈。拂劍君何壯。鳴弦我未能。莫言狐兔盡。側目有飢鷹。

寄琢之友聲

昨歲登高日。從君汎羽杯。只今千嶂裏。猶憶百年臺。風景人將老。江山客又來。殊方良會少。俛仰獨餘哀。

一藍岡夜行

亂峯斜豁月。臃臃。瘼火微明隔嶺東。孤障旌旗寒。炤雪。嚴城刁斗夜。臨風。鳴弓盡日隨邊馬。裂帛何時寄塞鴻。朔漠自來爭戰地。欲將書劍一論功。

秋日雜述十首錄五

軍城遙倚萬峯開。峯際浮雲繞堞迴。落日旌旗人出戍。秋風笳鼓客登臺。黑林險入重關斷。黃水深蟠入漠來。昨夜隔河新駐牧。平安火色到龍堆。

西山雜部古烏桓。東極三城屈馬韓。積雪四時當塞迥。河冰千里照關寒。種榆尙識秦人地。射柳空傳漢將壇。滿目沙場征戰後。誰將耕鑿起彫殘。

戍樓鞞鼓動嚴城。朔塞山川鬱戰爭。毛節未歸魚海使。羽書遠下鐵關兵。月高亭障千峯出。雪照旌旗萬馬鳴。莫道瘡痍猶未起。廟謨今日重東征。

朔風瓊幕擁旌旄。八陣營開筆架高。鐵馬兩頸橫寒草。水犀三翼動江濤。

時大治水軍於松花江。以流人

之習水者充棹卒。遷人未見征徭息。屬國微聞戰伐勞。漫道射鵬多健卒。只今文士習弓刀。役車歲晚未曾休。匹馬關河畫角愁。豈是邊人輕遠別。應知漢法重長流。海西雨雪移中監。槎表星河博望侯。總道故園戎馬徧。轉蓬何地不堪留。

贈友故祀丞

曾從郎吏侍瑤壇。羽衛森森扈玉鑾。一自橋陵成異代。翻從邊徼識祠官。金河萬里魚龍晚。銀海千年鳧雁寒。猶有遺弓當日淚。秋風沾灑在三韓。

贈唐副帥

唐公年少武且賢。十年部曲陰山前。握中鵠印桃花綬。櫪上龍媒杏葉羈。生少邊城誇任俠。珊瑚寶劍頻流血。挽強不數射鵬兒。入陣能攜畫眉妾。山頭草綠獸初肥。錦褶珠袍去若飛。筆筴數聲秋磧裏。看君拋鞞合長圍。

題淨公房

淨公精舍紛蕭爽。花石橫塔構佳賞。芙蓉曙壑凝早寒。松栝秋巖激清響。寂寂禪局掩北岑。泠泠疎磬出東林。定知習靜長趺坐。何必思歸動鳥吟。

送人之榆關

步君控弦兒。家世陰沙外。昔從弓高侯。西歎雲中塞。戎錦騰裝鞞。鞞紅魚文雙服鳴。鵬弓碧毛氍帳五千

騎。詔書分遣隸安東。單馬會穿白波壘。一劍能誇黑稍公。自從上將沙場沒。部曲分攜各南北。木根山畔不能歸。粟未營前更驅役。日逐何曾負口恩。段氏甯慙忘晉德。汗馬驂驪長苦辛。天涯轉戰白頭人。玉劍徒悲十年戍。鐵衣空盡九邊塵。今年奉使長城去。馬首重尋舊時路。河繞句驪候雁稀。關開鴉鵲行人度。清霜七月草初黃。箠築聲中磧路長。當時折戟秋原徧。一慟嫖姚舊戰場。

獨行城東循山至白崖

涉江企往蹤。尋山蹌遐軌。孤遊豈不懷。繁悲亦已弭。宛轉遵郊岐。攀崖眺別嶺。曾陰靄平臬。蒼烟引遙沚。林衣寒委綠。岩霏暮凝紫。遠鷗乍明沒。驚麋或騰倚。披覽興徒牽。逍遙思何已。軫此羈邊情。睠彼棲巖趾。躊躇我馬煩。將從叱羊子。

秋夜送下書記赴軍幕

明燭映華纓。檀槽雜鳳笙。離筵開鬪幕。別騎動層城。四五金波夕。三千玉塞程。翩翩阮書記。名貴武剛營。同雁羣城南。泛舟至白崖口。

數里層城色。迢遙帶落暉。欲乘孤櫂去。祇訝舊遊非。江晚滄波淨。山寒翠靄稀。微霜邊候蚤。愁攬薜蘿衣。密將山晚歸。東陳衛玉馮。玉文。

獨往秋峯裏。寥寥遠度鐘。燒痕依岸盡。林影入江重。有恨空橫笛。無家且賃舂。天涯烽火徧。吾道竟誰容。

晚步原上

柴扉猶返照。樵徑已涼風。暝色歸平楚。秋聲落早鴻。交疎知客久。身棄覺途窮。惆悵年華晚。吾將侶釣翁。

曉登天羅嶺東陳雁羣

滄江碧嶂曉寒凝。莽莽雲山鬱幾層。貂狗四時羶白雪。魚龍九月蟄元冰。放歌絕壑頻來往。抱病窮邊獨寢興。多難漸看豪氣盡。愧將湖海問陳登。

西山閣晚眺

落日憑闌四望開。江流如帶抱山迴。雲林晴色秋橫野。雪嶺寒光晚照臺。萬里塞垣長放逐。百年鄉國未歸來。天涯此日無衣客。愁聽清砧處處哀。

夜同諸君飲江亭

秉燭邀賓到野亭。蒼烟白露滿前汀。金尊美酒還堪醉。玉笛哀歌不可聽。明月蛟宮江漠漠。秋風漁火夜冥冥。却愁塞水多嗚咽。欲泛扁舟且復停。

木丹山曉行

滄江轟轟帶長巒。拂霧宵征路轉難。一片關城秋色動。半空旌旆曙光寒。阜鵬風急聞弓響。白雁霜清度角殘。十載從軍今未返。荷戈愁更出樓蘭。

自木丹還城作

蕭蕭征馬涉溪流。颯颯寒旌背驛樓。萬里獨來天北極。十年空逐海西侯。秋深城關還悲角。老去關山只

敵裘日暮登臺瞻大漠。黑松黃草不勝愁。

蒙古屯同雁羣晚眺

磧烟山雪遠蒼茫。落日層臺雁幾行。殘壘迴連寒燒紫。穹廬遙壓暮沙黃。邊書亂後應難達。客鬢秋來各已蒼。漫道山川堪極目。登臨無那是殊方。

帳中作示雁羣

白草高原繞拂廬。長天凝望意何如。關山夜月悲龍笛。江海秋風隔雁書。搖落漫驚時序改。艱難空惜故人疎。只今轉徙隨羊馬。敢向長沙問謫居。

冬至懷繡虎却寄

憐君經歲滯臨潢。至日傳書怨路長。雪嶺幾時歸遠戍。冰天何處轉微陽。蕭條晏歲長多病。零落窮交各望鄉。總是寸心灰死後。難隨葭管一飛揚。

除夕

寒燈相對恨如何。攪鬢星星愧漸多。一歲尙憐今夕在。半生空向異方過。哀笳絕障虛傳警。濁酒穹廬且放歌。漫道春光明日好。寒天冰雪正差裁。

雞嶺崖與王定之別

觀姬人入道歌

龍沙女子善歌舞。紅顏的皜方三五。自憐薄命失青廬。欲問長生歸紫府。聞道餐霞生羽翰。明璫聲繞步虛壇。舊著錦裙嬌試馬。新吹玉管學鷲鷲。盤龍鏡斂如雲髮。羽服襪襪曳輕雪。已裁茵蔯戴瑤冠。尙掃胭脂開寶靨。降真火煖博山爐。竊藥還能托月無。白玉帳寒憐罽幙。青岑醴熟厭醪酥。日暮然燈禮瑤席。清聲泠泠滿空碧。法曲能將漢語傳。隱文自用秦書譯。寂寂清關晝不開。駐顏何處望蓬萊。共憐飛雪金微外。更有明星玉女來。

山中

山下長烟松檜林。山家往往住層岑。泉飛丹嶂秋嵐溼。葉下蒼溪晚徑深。折芰每憐人獨坐。采參時見客相尋。烟霞不少中原地。十載殊方愧滯淫。

帳夜

穹帳連山落月斜。夢回孤客尙天涯。雁飛白草年年雪。人老黃榆夜夜笳。驛路幾通南國使。風雲不斷北庭沙。春衣少婦空相寄。五月邊城未著花。

寄贈姜京兆定庵二十韻

昭代論才傑。先生實擅場。人宗瞻藝苑。鄉譽最巖廊。議國會焚草。承家本釣璜。夕郎青瑣闥。京尹黑犀章。望久兼丁孔。名今壓趙張。官曹連鳳掖。封域劃龍荒。浪水侵遼綠。關雲帶闕黃。山川尊北鎮。居守重南陽。

共喜台衡逼。還看竹帛光。龍門延客峻。馬帳說經長。儒雅耽柔翰。風流凭隱囊。探奇興不淺。愛士勢偏忘。歲晏憐窮鳥。天涯恤鬢桑。詩傳子卿窖。書到幼安牀。高義驅流俗。微生愧激昂。幸邀千里顧。彌結九迴腸。恩重空銜涕。情深漫自傷。無家隨泛梗。有賦獻長楊。何日伸良覲。凌雲感聖皇。如能薦文似。矯首望楊莊。

封祀長白山二十韻

配極神山峻。修封帝命崇。金函新建嶽。玉檢此升中。咸秩遵虞典。昌期答漢功。星軺瞻二使。雲燎視三公。戴斗原承北。苞祇獨峙東。千年今值聖。萬歲昔聞嵩。地接與龍近。天開翥鳳雄。嵯峨分氣象。窈窕闢鴻濛。五時儀還陋。三祠禮自同。宗禋通肸鬻。展采契昭融。圭璧陳緹杏。駉駒製錦幃。日華遙合扇。雲氣迴成宮。列嶂輝瓊雪。雙流亘玉虹。壯哉符寶勢。赫矣麗璇穹。仙竊疑巖紫。高霞鏡野紅。何須傳縱雉。已見永垂鴻。芝本祥侔岱。枌榆祀比豐。紫壇三望徧。絳節百神通。運喜逢文命。書慙獻所忠。聖皇長有道。靈秩慶無窮。

